

求恕齋
叢書

校經室文集

四

新學齋
船
PDG

校經室文集卷四目錄

黃鹿泉先生家傳

工部郎中陳君家傳

蔣琴舟先生家傳

趙蘆洲先生家傳

毛制軍傳略

江蘇候補道前署廣東韶州府知府兼權南韶連

道陳府君家傳

王伯庚傳

于子和先生家傳

凌怡堂家傳

杜韞輝家傳

東承志家傳

李孝子傳

鄉賢李先生傳

鄉賢孫先生傳

蕭麗璇先生傳

李心傳先生家傳

鄒府君家傳

袁毅父先生傳

李母閻孺人家傳

李氏二節婦合傳

胡節婦傳

節孝王氏傳

漪蘭館詩集小傳

兵部右侍郎徐公神道碑銘

國子監祭酒王文敏公神道碑銘

太常寺少卿高府君神道碑銘

文華殿大學士贈太傅晉封一等男爵瓜爾佳氏

文忠公神道碑

鄭一泉先生墓表

大挑知縣畢君墓表

興化縣知縣張君墓表

河南候補道兼龔騎都尉又一雲騎尉吳君墓表

濟寧州學正呂府君墓表

浙江金華府經歷陳府君墓表

內閣中書銜前卽墨縣學訓導王先生墓表

直隸曲周縣知縣王君墓表

許州直隸州知州呂君墓表

知府銜河內李府君墓表

祥符王府君墓表

四品銜刑部候補員外郎王君墓表

候選府同知杜府君墓表

翰林院編修王君墓表

河南布政使孫公墓表

直隸補用知府前通州石壩州判高君墓表

兵部尙書兼都察院右都御史兩廣總督毛公墓

表

河南試用知縣南皮張君墓表

徐君墓表

楊府君墓表

安平縣知縣循良婁君墓表



校經室文集卷四

榮成孫葆田著

吳興劉承幹校

黃鹿泉先生家傳

先生黃氏卽墨人諱念最字寅清鹿泉其自號也卽墨

黃氏自前明多聞人 國朝順治中有以進士起家爲

直隸鹽山令課最稱循良天下第一遷戶部主事曰貞

麟者先生六世祖也自戶部而下仍世爲州牧縣令以

清白貽子孫至先生祖父乃皆以諸生老祖諱檀父諱

守平歲貢生生子三先生爲長歲貢君深明易理嘗彙

萃漢宋儒先說易書數十萬言爲易象集解大旨本繫辭近取諸身遠取諸物而不取互體變卦納甲飛伏之說先生少承家學事親孝篤於友愛治身以禮法自繩年□□補諸生始歲貢君勤苦力學不問家人恆產家事日益落先生以菽水之謀乃設教里中自定省外辰出酉入以爲常兩弟旣長皆從而考業焉嘗嚴冬讀書樓上衣一絮袍宵深人靜聲出於戶歲貢君聞先生兄弟讀書聲則大樂有從子某以貧廢學先生則攜之塾而自課其讀曰此子材可教吾不忍視其無成也族人有染厲疾者雖其親屬亦避之先生則朝夕往視爲延

醫診治病卒以愈先生性故介不好交遊邑令蔡君慕先生名時餽遺焉先生非課藝論文不私謁有郝某者先生母口孺人乳母子也以官事被譴乞先生爲一言終謝弗往洎母口孺人疾衣不解帶者旬餘口孺人卒先生旋亦病卒年甫三十有八娶楊孺人子二肇頤肇顥肇頤咸豐二年舉人選濮州學正贈先生如其官

孫葆田曰余與先生之子偉山學博遊得問遺行甚詳又習聞其鄉人言黃先生蓋天性純厚人也居母憂以父命故強就塾時時伏案而泣門人至爲廢讀未幾遂遭疾以歿噫先生足不出里閭其居家皆庸行然有足

以厲俗者余爲述敘一二以著鄉人士之隱德且以悲其年云

工部郎中陳君家傳

君名傳奎字星五一字棣生先世自滄州遷濰國初有陳兆鸞者中順治六年進士官至彰德府知府君口世祖也祖廷鈺乾隆五十四年舉人官四川知縣有循聲宦績載納谿定遠縣志入祀鄉賢祠父子修太學生候選州同知君由廩膳生舉道光二十六年優貢咸豐二年舉於鄉六年成進士改翰林院庶吉士散館改主事分刑部旋假歸養親值髮捻逆匪之亂在籍辦團練

君慷慨懷大略既不得志則馳逐於時好以自放用團
練功保加員外郎銜十一年秋擒匪至濰君率眾守陣
比賊退策其必再至乃偕眾督修東關堡屹然成重城
居民卒賴以保全者數萬家同治六年官軍平賊於山
東君與其勞敘功 賞戴花翎君性孝友弟傳怡早世
遺孤二君教育如己子丁生母康太恭人憂居倚廬三
年不入內室鄉人化之服闋入都供職時光緒元年也
余嘗與君同曹司見君遇事詳慎稽經誣律每日札記
數則嘗手輯秋審實緩比較成書數卷七年選授工部
都水司主事刑部長官有議留君者君謝曰窮通得失

命也然嘗歎曰吾六載讀律工夫今付東流矣在工部
尤自矜持不肯妄干人十四年題升虞衡司員外郎明
年大婚禮成賞加四品銜逾年升都水司郎中京
察一等記名以道府用君先後浮沈郎署十七年旋
以疾卒於京邸子二長澎早世次濳孫二皆習儒業始
君家居時以文章教後進一本先正法程以故及門多
謹飭之士濳自韓理堂先生得正學之緒爲人倫師表
名在國史儒林至君凡三四傳尙能循循守家法近稍
變矣君門人郎君峩山于君子和等請余爲傳余爲次
其事如右嗚呼遭時多難任事如君求之今日何可得

哉何可得哉

蔣琴舟先生家傳

先生諱□□字琴舟湖北荆門州蔣氏其先江西人也
先生之祖曰之澍官遠安縣學訓導遠安後屬荆門乃
改荊州府學訓導生子三長和珍州學生次兆鳳歲貢
生季曰兆莆先生父也母王安人先生少孤王安人攜
依先生從父深州君兆璠於通州十歲作月中桂賦天
門蔣丹林副憲見之曰此絕世聰明人語也益究心書
史未易可量年甫冠丁母艱歸里先是州學君旣卒無
子居頃之歲貢君又卒有子體章先喪無嗣先生以故

家中衰懼荆門之祀負焉罔託也因痛自刻勵晝治生
人產與庸保雜作夜則篝燈誦讀與家人紡績聲相聞
如是者數歲以詩賦第一補州學生是後名噪荆楚間
來學者踵相接深州君性素豪揮手千金卒後其子姓
或不能自存先生以脩脯所入時周卹之又令族人人
執一業無廢事無惰民由是舉族數十家無坐困者而
適會粵寇犯荆襄所至騷然荆州將軍官文恭公檄先
生行團練法爲荆州北路聲援有數人自賊中逃出爲
武官某譏得將以爲戮先生訊其情曰此良民也縱之
去得賊諜四人送荆州戮之賊不得閒未幾官文恭公

奉 命總督兩湖復檄先生率鄉兵援德安未果而巡撫胡文忠公聞先生名檄治十迴橋釐金是時湖北新設釐金局雜用官紳以集事先生治釐金十年供億無匱商賈不擾時已由廩貢生議敘候選訓導以功加國子監學正銜同治五年權穀城學訓導克盡其職嘗監修昭忠祠節孝祠費省而工堅六年民大饑上書當路設粥廠以振民又爲左右棚使蔽風雨民無疫疾八年受代去士民相送有泣者初道光之季江隄再決荊州民居蕩徙富家大族船粟往哺先生獨買豆熟以往比至而民無炊具得熟豆以活者甚眾十迴橋又東九十

里曰楊口楊水至此爲入湖之口故名未至楊口數里有大木蟠水底歲久舟人患之先生募人沒水鋸其木患乃絕其足知善謀皆此類也自穀城歸後益思嘉惠後進建白陽書院里中居平教子孫讀書雞鳴卽起令誦日前所讀書輒爲解說其義曰書貴少時記誦稍長則易忘吾於五經必歲讀一兩過非惟書味醴醴亦日增新得也光緒六年冬十月先生卒年七十初娶鄭氏繼娶姚氏側室周氏張氏子七人春榮楷模逢棠逢穀逢渠逢杰春榮爲從父體章後逢棠爲從父體宗後逢杰幼殤楷乙酉拔貢生今官山東候補知州有學而能

文與葆田善述先生行實屬爲家傳

孫葆田曰咸豐中先大夫嘗知穀城縣事先生所爲穀城志記先大夫修浩瀚亭及邑人歌詠頗具距先大夫去任時十餘年矣予不獲侍先生聞先生著述甚多書成輒棄去蓋不欲以文自見也然先生所蓄亦僅小試耳而荆襄閒至今人稱其善德使得盡其用所惠又烏可量耶詩曰雖無老成人尙有典型先生豈非古之所謂老成人與宜其見知於官胡二公而獨畀以事權也自官胡二公後楚事日非故先生亦卒不獲大用以迄今日則天下有無才之歎矣嗚呼天下豈真無才耶予

敘先生事蓋尤不能無感云

趙蘆洲先生家傳

先生諱鴻賓字知時又號蘆洲涉縣人父干城 誥封
振威將軍母王太夫人生子四長卽先生次鴻遠鴻舉
鴻臚鴻舉由侍衛起家官至曹州鎮總兵 記名提督
以武功顯名咸同閒先生年二十後入縣學旋補廩膳
生名噪一時顧困於鄉試屢薦不售咸豐七年弟鴻舉
在湖北幫辦軍務先生奉父命往視時安徽布政使李
公知其賢委辦糧臺事隨官軍克復英山霍山解固始
圍迭保訓導府經歷縣丞並 賞戴藍翎武陟毛文達

公之奉命辦團練也檄先生入帷幄連獲克捷奪荒
坡復尙店先生贊畫居多由是以知縣保奏歸部選
用並加同知銜而先生以侍親遽引歸不復與軍事矣
在家以化導鄉人爲己任嘗勸立義塾俾鄰里子弟誦
習其中鄉人化之爲立石頌其德先生有子五人長壽
崧候補府同知次壽椿彰德府學生次壽豐候補千總
次壽金縣學生次壽彤候補府知事孫二十餘人先生
卒於光緒四年壽金今爲杞縣訓導恂恂有父風先是
丁丑戊寅閒予遊大梁館河督李公所聞先生爲李公
所重嘗命其子與壽金同師上元魯星垣習科舉文及

今歲秋予來叔弟杞縣署壽金屬予爲文以傳先生其墓誌與表旣具矣予乃撮其大要爲家傳如右

論曰先生以儒士而嫻韜略有儒將風焉惜未竟其施而以候選縣令終不獲與介弟比烈然其居鄉多盛德爲人排難解紛誠義所感童孺知名亦胡可及哉予與壽金往還旣久言及振威將軍官湖北蓋與先大夫同時而予獨不得其詳今爲先生傳輒深明發之懷詩曰夙興夜寐無忝爾所生壽金與予可不交相勉歟

毛制軍傳略

公諱鴻賓字寄雲歷城人幼而穎異見者咸以大器目

之弱冠名籍甚道光十一年舉於鄉十八年成進士改庶吉士散館授編修歷充國史館協修纂修總纂官癸卯順天鄉試丁未會試同考官戊申御試翰詹列二等旋擢江南道監察御史陞禮科掌印給事中疏言外省虧空流攤之弊請敕禁革下部議行丁母憂服闋咸豐二年補兵科給事中時粵匪紛擾半天下疏言今日不患盜賊之不平而患紀綱之不振自古未有憲典不明刑威不振而可以立國者請嚴賞罰嫻紀律又言欽差大臣賽尙阿駐衡州北路空虛請簡重臣分駐武昌襄陽以固藩籬上韙其議三年春奉命回

籍辦團練

陸辭時面陳團練利弊及東省捐輸艱難

上爲霽顏曰汝好爲之明年粵匪李開方據高唐陷臨清公率鄉兵阨河而守賊不敢窺又疏劾 欽差大臣勝保玩寇糜帑五年 簡授湖北荆宜施道未赴六年調安襄鄖荆道當是時巡撫湖北者爲益陽胡文忠公初胡公見公所上疏曰所言係天下安危可謂鳳皇一鳴及公在襄三年擒匪不敢窺伺文忠以有膽有識調度合宜保奏奉 旨賞戴花翎其後文忠又以好善嫉惡秉心公正密薦十年五月 擢安徽按察使以民情愛戴暫留任九月 擢江蘇布政使百姓遮留不能

得十一年四月奉 命署湖南巡撫疏言前撫臣張亮
基駱秉章於吏治軍務實力講求用能削平寇盜卽如
左宗棠識略過人其才不在曾國藩胡林翼之下若畀
以封疆重任必能保境安民尋卽實授湖南巡撫是歲
文宗晏駕胡文忠亦薨於位十一月逆酋石達開犯
湖北竄貴陽公先後遣副將周達武等擊破之同治元
年石逆陷湖北來鳳公遣總兵趙福元復其城而會直
隸有寇警禮部侍郎薛煥疏請添設四鎮 詔下各省
督撫會議公疏陳選將召募約束餉糈四難擬於募勇
略增其數選將訓練綠旗營兵以資捍禦直隸總督劉

武慎公長佑覆奏亦如公議山東淄川逆匪劉德培爲亂有旨命公籌一旅保衛桑梓公薦長沙太守丁寶楨可大用遂授爲山東按察使其後削平寇亂洵任封疆至四川總督卒諡文誠人咸服公知人之明公與曾文正公爲同年友最相知文正嘗密疏稱其忠愛之忱達於面目二年夏五月陞兩廣總督劾罷巡撫與布政使之不職者墨吏望風解印明年夏金陵克復江浙餘氛未靖公疏言江西南南路與閩粵交界均無防兵浙江湖州各城克復後賊必悉眾上竄臣已派一軍於閩粵交界會同大軍進勦請 敕下曾國藩等兼守南贛庶

可一鼓蕩平是年冬粵匪戴梓貴擾高要東平諸邑公
命總兵卓興擒斬之督廣年餘平寇無數黜華崇樸風
氣一變旋坐湖南任內失察藩司委署不公降一級調
用去官之日人莫不咨嗟太息公獨處之怡然公所至
必力籌大局同治初貴州苗匪姜應芳據銅仁四府公
命總兵趙福元往破之廣西巨寇張高友據蓮塘十年
公奏派提督江忠義協剿誅之蓮塘既克公疏言浙江
巡撫左宗棠深入腹地宜命江忠義帥師顧其後路令
道員席寶田先行江西當事移檄止之公曰彼意餉事
難籌耳我豈以私誤公者未幾賊果上犯江西兵潰賴

席軍馳至大破賊眾公料事多中率此類平居慎於幽獨初在諫垣有直聲居官人或有誣讟之言公不以介懷曰吾用人行政事事可質天地鬼神何憂何懼卒年六十有三是時丁文誠公實巡撫山東先是濟南城外有土圩以防寇文誠用公言改建石圩同治六年寇至不得逞公猶率鄉兵協守明年疾作遂卒浙江陸心源爲公神道碑所敘世系及歷官政績詳矣子慶澄附貢生二品廕生由通判保升直隸州知州遞保知府至道員克承父志承霖優貢生光緒十四年舉人由湖北同知保至道員亦以材學稱

江蘇候補道前署廣東韶州府知府兼權南韶連道陳府君家傳

陳府君諱應聘字肇莘一字覺民先世直隸滄州人明初由滄州遷居山東濰縣數傳至侍御君所問以進士起家及孫調元亦由進士出身仕至刑科給事中祖孫並有聲諫垣由是世以詩書爲業自府君而上四世名顧不大顯然濰人猶稱爲科道陳家云曾祖志敬祖可久父國璞皆太學生皆以府君貴累贈通奉大夫妣皆贈夫人府君兄弟五人於次爲第四伯應芬舉人後官長清桂平教諭仲應軫少棄儒業持家政叔應召

爲伯父後季應樞舉人後官直隸候補道府君弱冠入
縣學爲廩膳生充道光五年選拔貢生八年與從兄應
奎同舉本省鄉試十三年成進士引見以知縣用分
發四川十四年充四川鄉試同考官所得多老成士適
猺夷爲亂大軍進勦奉檄赴峩邊廳協助轉饟事事竣
補新都知縣明年丁母憂服闋在籍侍親以父命促之
出始謁選二十年選湖南新田知縣是時宣宗臨御
日久尤重牧令職引見時詢知歷官所至遂改授四
川岳池知縣以四川爲君所曾履也二十四年大計保
薦卓異旋丁父憂去職二十七年選授廣東曲江知縣

曲江爲交廣咽喉山徑崎嶇謠獍雜處時外夷入犯警報頻聞君旣到官嚴察保甲謹防內寇晝則巡行村野夜乃清理案牘歷四年如一日政治民安卒以無事先是大府知君政績已奏請調補新會新會素號優區攝篆者多方阻君咸豐二年始得抵新會任逾年而有紅巾之禍紅巾者順德會匪何六有眾數千以四年五月辛亥踞東莞石龍墟作亂順德鶴山相繼陷省會戒嚴韶肇惠嘉四州以次蹂躪新會南通雷廉北負南順西控高肇東界青山羽書紛馳達於宵旦府君亟召邑紳謀守禦之策廉知舉人何瑄負文武才開局團練事無

鉅細悉委治之延舉人何超光附生陳殿蘭武職何定章武進士許德元等共襄其事爲壇誓眾首捐五千金爲紳士倡所需軍械積聚旬日畢集當是時賊號三十萬首攻東門君手劍呼礮殲其渠魁賊銳甚晝夜環攻彈丸如雨下君督守益堅遇雷雨雨從頂注屹立城堞不少動婦孺遙望疑以爲神城守六十日告急之書十餘上先後大小之戰二十有六俘馘以萬計八月庚戌援兵至賊去圍解邑人相與慶更生乃謀爲君建立生祠方事急時偕邑紳何瑄等出行拊循百姓見道旁古井徘徊良久曰此吾儕併命處也瑄等不覺泣下蓋君

之自處有素矣何瑄曰 國家承平二百年文武吏相
高無事一旦盜賊發亂將不可治諸鄉宦老縫掖習慣
太平或首鼠兩端臨時爲自全計公獨與瑄等數書生
日夜計畫辦給聞鼓鼙聲輒裂袷相告曰我爲守土吏
良不惜妻孥一開門與賊決死戰以孤城當闔省西南
壁城陷卽高雷數郡望風瓦解非 朝廷有安危所關
豈一邑事哉烏虜觀府君之所以語瑄者其心志又可
知矣事平敘功奉 旨賞戴花翎免補同知以知府補
用六年署韶州府知府明年兼權南韶連道篆會從兄
應奎殉難武平預遣人接其眷屬至粵幸獲保全又明

年謝事至省垣是時府君歸志已決乃遵例捐升道員
指分江蘇候補同治紀元遂乞休旋里時伯兄教諭君
在籍教授生徒而仲兄叔兄已前卒季弟由北河同知
洊保道員需次畿輔府君以老年兄弟相見無幾屢書
促觀察君歸三年五月觀察君歿於保定府君聞耗大
痛又前守新會積受暑溼至是病益增劇遂以七月四
日卒春秋六十有五娶丁恭人側室惠宜人子五爾楨
長蘆候補鹽大使爾榮由 國史館騰錄議敘候選鹽
大使並加同知銜爾榕爾楫爾植皆早世孫六世昌光
緒三十年進士今官吏部主事德昌二十九年進士廣

東河源縣知縣克昌太學生芝昌廩膳生早卒穀昌燕
昌皆縣學生曾孫十五人元孫二人曾孫輩長者均能
讀書克世其家

孫葆田曰予聞陳府君守新會事久矣同時守潮陽者
爲濟寧李君後因保升知府官至廣東巡撫而君則中
道解組歸歸又不四五年以卒世或甚惜之然予觀新
會何君所爲陳侯生祠記及縣志所書宦績其功德在
人遠矣世昌兄弟並從予遊閒示予新會靖變識略與
岡城枕戈記敘戰守事甚詳予獨取何君志論與世昌
所述行略著於篇士之遭變而不能守者其必如陳府

君之知人善任以忠誠自矢而後能審所處哉

王伯庚傳

吾友會稽王子獻有賢子曰祖杰初字伯剛生而靜默五歲入家塾大父母父母咸愛其聰穎十二歲已徧誦六經能通其大義未冠補縣學生五應鄉試皆以官卷額隘見遺年僅三十一而卒卒之前一年子獻忽自汴寄書命更字伯庚曰庚與剛誼通剛吾慮其易折也若有先識者然伯庚生於大父金華府訓導署中以大父命爲伯父後幼時連遭大父母喪擗踊如成人見者異之王氏爲會稽士族世有名德伯庚叔父子詒以禱母

請代自沈月湖死士大夫爭爲詩文頌之世所稱王孝子也伯庚時甫十歲亦操筆作誄詞人尤以爲奇其爲學官弟子員也與季父同遊泮水余同年友鮑敦甫編修爲題其行卷曰小竹林試草以其先嘗有竹林試草合刻也李越縵侍御時官戶部自京師寄文評獎人咸謂王氏有子矣及父子獻入翰林以書名重於時四方朋好及九夷使臣方外緇衣之流以楮素求書者踵相接不能徧應則命伯庚代爲之書其於四體書無不工小篆則初法完白山人進而求之當塗又進而求之石鼓文吾鄉王文敏公嘗見其爲人書便面篆文以爲張

舉文一輩人也而竟不壽以終其命也夫娶潘氏爲伯
循鴛部之女鴛部始登第南歸見伯庚幼慧卽許以女
妻之故伯庚平生所得潘氏家遺墨尤多亦猶孔信夫
之受筆法於華亭張文敏公蓋非獨家學淵源亦其濡
染者深矣潘氏于歸九年生一子甫二日而殞以是得
疾遂不起伯庚亦以次年四月十一日卒初伯庚所嗣
父年十九而卒婦孫氏亦年十九以不食殉夫 朝廷
旌其節烈婦卒後十年而伯庚始生及伯庚夫婦又
同歲又相繼卒又無子嗣故其本生父子獻哭之逾時
而慟其仲弟祖榮敘述事略以敬求銘傳於當世路訪

巖觀察實爲之誌銘其論生死天壽之義略備矣余乃別爲傳以紓子獻之悲子獻名繼香由翰林院編修改官知府分發河南候補與予爲文字交

論曰余嘗見子獻贈路君聯文稱其家爲儒林文苑合爲一傳如王君父子乃可謂不媿名德後矣余聞伯庚所生金華府學舍遙對婺州芙蓉山有洞天勝蹟故伯庚幼名蓉孫而所著有玉芙山館雜稿皆未成編惜哉王氏刻有清芬錄其世德與節烈孝行皆有傳茲故不論獨論余所知於伯庚者以爲雖死而名不朽云

于子和先生家傳

于先生文中字景通又字子和先世自文登遷濰父諱
祉有學行以處士終其身吾鄉所稱澹園老人也澹園
既有高名不事家人生業生二子于和其次幼聰敏沈
默寡言七歲入家塾讀書不待督責澹園所講詩古文
義法雖少小輒能通其意苟有得卽札記之弗敢忘性
醇謹侍親左右無違事繼母如母繼母口孺人晚年得
廢疾坐臥飲食皆需人惟子和能先意承志曲得其歡
心及父母相繼沒以哭泣過哀遂得目疾伯兄歿遺孤
三人撫之如己出及家人議析居乃命己子二與兄子
三均分焉居恆自奉儉約非祭祀與有客至不肉食每

日黎明卽起躬親灑掃遇春秋祭祀先一日卽齋戒必誠必敬以族譜失修日久爰集宗人倡立條規爲續譜復親爲之序少承先志不汲汲於科名弱冠後始爲博士弟子員中年迭遭大故不與試事者十餘年至光緒己丑 恩科舉於鄉年已五十有二矣先是黃閣學體芳校士山東歲試取先生爲一等例補廩膳生故事以七月十五日截缺先一日學署已具文序補矣適會口儒人於次日病卒有與先生爭先思得廩餼者乃誣先生丁憂爲十四日或勸先生與之辨先生曰焉有身居苦塊而與人爭是非者其後乃以今總憲陸公爲學政

時取列第一名食廩餼及再上春官不第亦遂無意進
取矣嘗主講平度書院從遊多知名士今川督錫公又
嘗介友人以書招往山西謝不往癸卯秋七月以疾卒
年六十有六子二濂芳萊州府學廩膳生清芳亦習儒
業孫二並幼

孫葆田曰先生長余二歲余於辛卯冬始識先生嘗延
先生至叔弟武陟縣署課余從子讀先生循循善誘與
人交無遽色無疾言見者莫不竦然起敬當庚子京都
變起濰有亂民焚教堂事邑人大恐或議攜妻孥遠避
先生曰我能往寇亦能往去將何之其臨事有識如此

壬寅春余護叔弟喪歸自光州先生親來弔唁爲之出涕是年夏余返河南其冬聞先生得疾及明年秋九月余復護季弟嗣子之喪至濰則先生歿已三月矣聞先生臨卒遺令葬儀悉依通禮不得作佛事濂芳等已乞吾老友張次陶誌其墓余乃流涕而爲之傳

凌怡堂家傳

君諱顥德字怡堂其先固始人明初遷居西華入國朝有諱謙者由武舉起家官至雲霄鎮參將爲君五世祖父諱松林中道光二十年鄉試第一名舉人咸豐三年成進士官至直隸補用知府加道銜 誥授中憲大

夫以循吏稱歿後崇祀名宦雄縣民爲建專祠祀焉君以諸生隨父任名邑迭著勞績父命援例入仕時功令無父子迴避例故得以縣令需次畿輔初補靈壽令靈壽爲先儒陸清獻公舊治君始至喜曰吾得所師矣凡所措施寬嚴交濟民愛之如慈父母以母憂去邑人於松陽書院懸道媿先賢扁額以志遺愛君以不得視母含歛悲哀甚致得疾服闋擬不復仕父督之出逾年補盧龍令清積案除暴安良一如治靈壽文文忠公嘗因公過盧龍聞君政績極稱之旋丁父憂歸服闋再出游方伯智開語人曰吾聞凌君盧龍至今民思之非惠政

入人者深何以至此又知君素究心水利乃委君辦大
清蘆僧河工四年而工定委署臨榆改調雄縣雄爲中
憲君故治慈惠在民君亦因辦治河工與其耆老習恐
狎而生玩也下車卽示諭紳民毋得以私事相干是時
大清河決侯留村口君以水鄉民瘠苦倡捐督修並請
緩赴河閒本任力任其勞閱數月工竣始行邑人爲立
石隄上曰凌公隄過客咸有歌詩而寶竹坡侍郎一章
爲尤著云其詞以爲河雖徙隄未移則君名常在也君
旣莅任河閒以緝獲重盜功議敘適有使者察河渠議
以縣境及大城爲鄰邑壑君力爭之幾獲譴未幾調肅

寧肅寧之民旦夕望君至而河閒民亦禱於神願君復來乃終以他事開缺逾年補武邑先署大名又署肅寧癸未秋始莅武邑未三年遽以疾卒光緒十一年某月日也有子三人長甲棟增貢生次甲塋優廩生次甲煊丁酉拔貢生與葆田善嘗裒集兩世遺書及友朋詩文曰循孝贈言用沈叔眉侍郎所題循吏孝子語也其細行則湖南黃曙軒先生所敘君傳備矣葆田爲掇其大略如右

論曰予嘗過雄縣見所謂凌公隄者聞邑人猶稱君兩世治行弗衰記曰君子也者百姓歸之名謂之君子之

子如君父子信可謂民之父母矣黃先生謂君奉陸清獻爲師亦良吏亦孝子其儀型百世宜哉陸清獻治靈壽七年君先人治雄縣亦七年而君所至皆未久然治蹟幾比陸清獻信不媿家教云

杜韞輝家傳

杜韞輝名鏐掖縣西杜氏韞輝其字也先世由四川遷山東萊州所居村久而成聚曰杜家村村故瀕沙河河北流入海一統志謂之白沙河道光末河徙西北行村外隄樹被水齧幾危君獨躬親壅治積數年隄復其舊村以無虞所保全甚巨而君家故非饒裕人或謂形法

家言村爲水氣所鍾當有素封者興富而好義者應之
旣而君二子景渭景漢以善治商賈起家累資數百萬
光緒七年河決山東口口災黎徧野時君歿已數年景
渭承父志捐千金助振奉 旨旌表甲午乙未閒中東
戰事起景渭復捐銀二萬助軍需 朝廷嘉其勞其急
公好義皆自君啟之也始君由議敘同知 例授奉政
大夫及子孫相繼貴顯 晉贈君爲中憲大夫至是又
蒙 恩賞給二品封典鄉黨以爲榮配張氏與君同志
嘗偕君拾薪以供翁姑晨炊後及見子孫富貴亦 累
封夫人

孫葆田曰沙河杜氏有二其一與予兄弟爲齊年交予聞韞輝君行誼久矣君少爲伯父後伯父僅有中人產而君本生母垂老多病季父貧且無子君事三父母如一曲盡孝養咸得其歡心用能孝友傳家子孫遂致豐厚迄今客車過沙河者莫不豔稱杜氏豈非所謂積善餘慶與予故采君遺事而尤獨重其篤行亦欲使異時觀民俗者有攷焉

東承志家傳

東君繼宗字承志世爲淄川人曾祖文禧以儒醫稱於邑祖父業儒不善治生家因日落父年二十餘尙從師

受讀其後乃改習商業服賈江南時君生甫八歲值祖母病獨求醫藥必得愈而後喜見者以爲難能年十三卽從父江南學爲賈每念母在家勤苦輒不樂父因使歸治貿易里中無何聞父歿君慟不欲生母諭以靈輻未歸不宜致哀毀乃盡質婦嫁時衣躬往扶喪婦亦能如其志也旣營葬畢理生如故居數年家業漸贏遇鄉有義舉無不竭貲贊助暇輒讀醫書思繼先人志嘗配合名藥或外出卽隨身自帶以施人晚歲家居求醫者踵相接其貧且遠者則留之外舍食以餽粥有來謝者必卻之觀察使李公聞君行嘗獎以存心濟世扁額君

受而藏之命其家勿懸也自君繼父爲商前後幾四十年不避勞瘁當咸豐中南匪擾掠邑境母口氏適病歿城中君措置有方克完大事同治初土逆劉德沛據城君已避寇鄰村偕父老築村堡晝夜防守又於所居村南治石橋以利行人至今過客便之村人有買童女爲妾者未入室而村人故其母欲求放還而無力君聞乃代爲償其值遂得母子歡聚其慷慨好義多類此始君先世所居曰慕王莊君以先人廬墓所在七十後遂徙居焉卒年七十有七子夢庚求遺言君曰吾生平惟守臨財毋苟得之戒汝能奉而行之吾無憾矣又遺命身

後無厚歛鄉之人咸歎惜曰是能以勤苦起身且施德而不望報者也烏序是可以傳矣君之子夢庚旣承家蔭乃援例爲君請五品 封典如禮云

論曰昔東廣微補南陔詩其首章曰眷戀庭闈心不遑安方君奔走大江南北以謀生送死其心何嘗一日忘父母哉書稱肇牽車牛遠服賈亦以孝養爲重耳人皆知東君晚而家益饒裕豈知其根本所在不媿祖德云云耶予聞君生平無戲言無怠容雖鄉人狡黠者莫不感而生媿是固然已然予尤重其質行故爲傳次如右

李孝子傳

孝子李中和字時堂先世籍鄧州孝子幼隨祖父遷葉縣之尤潦村家赤貧祖父爲人佃孝子鬻柴以佐養母楊氏性嚴厲孝子事親不少忤親疾視湯藥數月不交睫咸豐十年皖匪竄葉孝子母病臥牀褥未能行孝子負之避賊近家人盡逃獨守母不肯去無何賊大至孝子以身蔽母曰可殺我勿傷吾母跪乞不已賊爲感動相戒勿擾舍之去越宿家人返見孝子僵臥道中仍遲叩喚之醒乃扶歸見者哀之母旋以天年終孝子哀毀骨立廬墓三年遇忌日輒泣涕終身不改孝子晚歲精醫術其後家稍裕施藥施食不怠年六十六卒娶鄭氏

事翁姑柔順謹慎亦以孝稱光緒二十二年里人采孝子遺行詳有司上請大府題請旌表得旨建坊如

例

論曰李孝子天性孚人沒而終能食報予得於所聞者如此孝子有子曰沛爲葉縣諸生其同學高炳宸嘗爲孝子作傳稱其五世同堂獨能調處輯睦人無閒言嗟乎是固然已然孝子之得旌表獨以負母退賊與廬墓事見重耳其他事不盡傳而有子有孫將大其門子於是益不能無感云

鄉賢李先生傳

李先生諱元細字葉初一字青函章工人生而敦篤少
長讀書卽嗜程朱之學家故清貧事親以孝聞教授鄉
里束脩所入甘旨無缺母病焚香籲天求代病旋愈又
八年母卒事父愈謹道光二十九年以歲貢生舉順天
鄉試學使劉詹巖先生嘗以孝養績學表其門爲鄉人
矜式同治元年舉孝廉方正先是咸豐中捻匪竄擾山
東先生倡議於所居舊軍鎮築土堡以爲防禦其後寇
再至不得逞近村避亂入堡獲全者無算同治六年粵
匪餘黨犯東境鎮獨峙然無恐邑故有繡江書院先生
率士紳集貲重修規模大具又以其閒輯修邑志以備

文獻考資由是士皆奮起嚮學其他事有關於風化者無不竭誠爲之亦其學行所推者然也七年選授鉅野訓導勤心訓迪月有課日有程士習丕變當是時平遠丁文誠公巡撫山東建尙志堂於金縷泉上以培植正學聘六安吳侍郎主講席不至乃以先生爲監院諸生受約束惟謹先生終日危坐無惰容平居言動必依於禮法其教人必由朱子小學入嘗置日省簿以考察言行又嘗語諸生曰聖賢道雖高遠然皆有層級可尋人但患志不定心不專耳又曰古人絕大事業皆由誠敬做起其自道所得如此所著有五子近思錄注釋十四

卷居業錄注釋四卷十三年春卒於書院春秋七十有五子某某孫幾人曾孫敦益光緒某年舉人三十一年巡撫楊文敬公以先生行實入奏奉旨由禮部議准入祀鄉賢祠

孫葆田曰先生門人孟憲璋余同年友也嘗稱先生出入宋賢堂奧真道學有得者余於同治辛未壬申閒嘗一再見先生今三十餘年矣先生名在國史又有劉編修表其墓所載言行大端已自可傳余更爲傳以識其崖略亦庶幾聞風興起者鄉人知所歸焉烏虜道之不明學術益歧求躬行君子如先生者曷可多得哉曷可

多得哉

鄉賢孫先生傳

先生諱錫輅字德輿鄒城孫氏世有隱德自高祖以下五世同居父諱獻廷有子三人先生其季也幼秉庭訓讀書一室兄弟友愛逾常嘗額其堂曰棣華里黨中有兄弟鬩於牆者父老輒引棣華孫氏以媿厲之先生早孤弱冠卽授徒於外學以通經致用爲主其教人必勸以敦品勵行不沾沾於章句文字之業而亦以是傳諸家故及門之士與其子弟輩多所成就先生由咸豐辛酉拔貢生同治元年舉於鄉所居在鄒城縣西曰馬頭

鎮咸同閒粵匪滋擾所至土匪蠡起相應鎮爲一邑精
華所聚先生倡議築圩爲守禦計圩成而賊匪大至得
保無虞鎮東北隅曰牛市或議畫界而守別築小圩先
生與兩兄商訂捐簿聯合同志籌貲補助其後賊數圍
小圩不得入兩圩亦終合併同治十一年大水衝刷沂
河隄馬頭鎮北枕沂河勢將決口先生率合圩人集木
椿柴料竹纜帖隄迅下三晝夜始獲安全水落後復購
石爲基以圖久遠數年工竣遠近咸蒙利焉邑有一貫
書院荒蕪日久縣令李君延先生主講席因察有典肆
舊存息款又募捐市稅釐定章程修葺齋舍設宗聖神

位率諸生以時習禮其中又勸捐紳富修建考棚士習
文風蒸蒸日上光緒三年選授聊城縣學教諭課士一
如其教授生徒時寒士以贄進者卻勿受十年十一月
晦卒於任所柩歸諸生有送至百里外者卒後二十年
邑人追念舊德與子友蓮孝行造具事實冊結公舉入
祀鄉賢經山東巡撫奏請咨部遵照新章分別立傳
友蓮字幼青同治九年舉人光緒元年舉孝廉方正年
弱冠時遭寇亂值父外出扶母攜幼弟避難望見賊氛
潛伏榛莽中得免隨父爲善鄉里事無不舉父任聊城
教諭以母患頭風屬弟友萼侍父往而身留侍母疾迨

弟以父命援例入內閣供職京師私念父老需人乃稟命於母往省父未久而父病醫藥必親嘗父卒視含歛俟弟歸扶喪返里又婉曲勸母節哀恐觸發舊疾也及葬一依禮制生平曲體親心兄弟怡怡內外無閒言厯署秦安樂安訓導補肥城訓導悉依家法爲多士楷模及甲午成進士 欽點主事分戶部學習乞假省親回籍後遂不復出家居七年母病食不飽夜不寐以弟遠任江寧獨力經營凡附身附棺之具必周必慎比遭大故猶引咎自責日夜號泣不止竟以哀毀距母歿四十九日而卒聞者咸稱其孝云

孫葆田曰戶部君與余同歲舉於鄉其弟友萼字花樓
又與余叔季兩弟爲鄉貢同年故余夙知先生世德頗
詳蓋詩書孝友之澤長矣花樓成進士在戶部君前今
官江南知縣有循聲而余叔弟不幸卒於光州任所其
政績曾由河南大府奏請 國史館立傳余季弟亦以
孝行 旌獨余垂老無成執筆爲先生傳蓋未嘗不赧
顏滋媿焉烏虜賢孝萃於一門如先生之世澤流衍何
可及哉何可及哉

蕭麗璇先生傳

蕭先生衡字麗璇一字荔軒歷城人祖虞廷父玆唐有

學行先生胚胎前光幼雋異祖父授以經傳諸說輒能
解悟同邑何鄰泉先生一見器之妻以姪女弱冠補諸
生丁父憂喪葬悉依禮經先是家故有鹽業後雖虧累
尙存親友借券甚多皆無力償還先生悉出焚之曰士
貴自立留此何爲乃發憤攻讀以教授鄉里爲仰事俯
畜資學旣成試輒冠其曹願以數奇列優等十二次始
食廩餼鄉試膺薦者九備中者七而卒不獲售年逾四
十乃就教職先後任黃縣教諭訓導潔身教士學者翕
然宗之黃縣多富室苞苴盛行先生於非義之財一介
不取其課士也月集士子於明倫堂教以讀書窮理取

法宋儒爲濂洛關閩之學嘗手書朱柏廬爲官心存君國讀書志在聖賢二語爲楹聯俾學者見而知警繼署昌邑縣學有某生因事涉訟邑宰誤聽人言誣以匪亂時曾劫質庫諸生譁然先生力爲昭雪事乃得息又一署壽張縣學一如在黃縣時先生自授徒里塾至此教學垂四十年及門之士掇科第者指不勝屈而先生則壹意敦行不復以功名爲念撫弟及諸子恩義兼至戚黨有悖獨者時周恤之與人交忠信篤敬粹然有儒者風晚歲家居與同里尹都轉式芳李中丞慶綉汪太守兆侗吳刺史夢齡陳觀察欽傅觀察廷琦賈學博邦達

李教授春元詩文游讌里人稱爲佛山九老年六十八卒著有詩義約說以約齋詩文集妻何氏年屆百齡子樹昇光緒乙未進士戶部主事孫恩慶德慶皆縣學生以儒業世其家

孫葆田曰余昔主講尙志書院時先生已前卒不及接其言論丰采獨聞先生生平篤內行及教學大指從學者皆來往如家人父子故先生歿後所任三邑諸生徒應鄉試至泐南者猶相率展墓致敬焉先生之子樹昇從余遊所稱述如此烏虜先生可不謂耆儒與

李心傳先生家傳

德平李先生諱法中字心傳濟南府學生性至孝自幼
讀大學論語卽謂聖賢言語皆分內事父母歿三年不
入私寢平生無妄語無惰容教人以小學近思錄爲敦
倫立品之方文章根據理要著有讀大學劄記論語劄
記性理劄記士大夫競相推重以爲篤行君子子敬修
敬身敬熙皆舉於鄉敬躋歲貢生皆能世其家學
敬修字子靜一字吟舫幼聰敏讀書能強記好吟詠守
庭訓事親未嘗有違忤與諸弟共筆硯講論切劘父患
風痺復病疽禱於神乞減已壽以愈親疾光緒丙子舉
於鄉一試春官不第逾歲卒著有望雲吟館詩鈔

敬身字省吾生而沈慎稍長受書庭訓恭嚴獨坐齋室
至日晡忘食弱冠受知於督學使者同治壬申膺選拔
貢生明年中鄉試舉人甲戌應禮部試未及覆試遽疾
歿於京邸年甫三十有一

敬熙字文止又字少傳幼隨父兄避亂厯下肄業濼源
書院試輒冠其曹爲學恪守庭訓篤好詩易嘗曰易以
寡悔尤詩以道性情於日用行習最切舉光緒乙酉拔
貢未及 廷試丁父憂辛卯舉於鄉主本邑書院講席
八年厯主鉅野日照各書院禹邑校士館小學堂時有
倡言廢講五經者獨斥駁之嘗曰士不患貧患不立志

耳所著有臨邑縣志

鄒府君家傳

府君諱湘皋字衡臺荏平鄒氏所居曰馮官屯先世在明季嘗有聞人至府君祖父以農業起家致巨貲有田數千畝祖諱述禮父諱振岐太學生府君生有異稟少嗜讀書慨然有濟世之志年旣冠入縣學食廩餼從清平王心潭先生遊同學二三十人皆高才生府君獨以謙退稱冠履樸素食甘麤糲王先生心異之以爲鄒生器量未易測也顧屢應鄉試不獲舉太學君年漸高遂以家政付之咸豐五年粵匪李開芳由高唐驟竄至馮

官屯聞府君家有積糧據圩而守盡驅居民太學君出
稍後偵知匪酋所居室當是時忠親王僧格林沁統大
兵圍勦馮官屯府君奉父命詣軍門告知匪酋所居已
室官軍以巨礮轟擊倉箱盡燬賊無所得食府君復獻
策引河水灌其圩大軍具知道里遠近李開芳成擒王
欲爲府君奏請獎敘府君曰國家除巨患閭閻獲安堵
生始願畢矣今故里盡化丘墟若因以爲利父老其謂
我何卒固辭其後乃援籌餉例以訓導候選未幾太學
君棄世府君哀毀盡禮同治二年土寇起七年擒匪大
至府君益出家財佐治團練官民皆賴之桂平舊有壇

廟祠宇多傾圯城樓雉堞半皆墮壞府君捐資次第修治忠親王遇難曹州奉 旨立功地方建祠咸同閒殉難男婦有 旨建忠義祠厥費甚鉅府君並獨力任之時久亂後地方凋敝凡有公舉府君無不首先爲倡親族鄰里因難失業者皆量其才能給資本使謀生理十三年府君遽以疾卒年口十有口子德義咸豐辛酉拔貢生官刑部員外郎方年少時府君爲除學舍延名師聽四遠之士來學歲嘗數十人及其筮仕刑部也府君諭之曰自余先世皆欲以讀書發名成業余顧不能掇乙科以報祖父其志之所存有非一秀才所能爲者汝

其勉之府君少所從師孫先生欽若宦遊浙江二十餘年暮歲歸來清風兩袖府君爲治居第養其餘年及府君卒孫先生哭之慟曰吾非哭其私惜其未大用於世竟齋志以終也初鄒氏有家祠燬於兵府君廣購基阬恢其規模又多設院宇庖湏悉具爲族中弟子讀書義塾又置義田數百畝事未蕝而病劇遺命刑部君踵成之府君以子貴由員外郎加三級 誥封中憲大夫

孫葆田曰刑部君與予先後同官西曹予夙聞鄒府君佐大軍平粵匪李開芳事甚詳今刑部君歿已數年有二子長兆訥仕爲山西吉州知州以伉直不能合時棄

官而歸次兆敏字慎言以字行光緒己丑 恩科順天
舉人內閣中書並有祖風與予善以崔君肖庭所爲府
君事略屬爲家傳予爲撮其大要如右烏虜世方多故
如府君之見義勇爲功成身退口不言勞其志量曷可
及哉

袁敬父先生傳

袁先生錦字子文一字夢苕晚號敬父秦州人父蕙菴
母王氏以節孝 旌先生生而肫篤自幼讀書習舉子
業不爲剽襲之學年十八入揚州府學嘗肄業梅花書
院再應督學試以性理論列優等屢躋棘闈光緒元年

恩科鄉試同考官以元卷薦觸典試者忌不入式同
郡儒林劉壽曾見其卷深爲歎惜因勸其纂楚辭疏證
以補戴東原氏屈原賦注所未詳先生由是益肆力於
古學爲文初擬庾子山繼乃宗唐宋八家嘗問弟鑣曰
吾文何似對曰似南豐則大喜詩五言學文選七言古
近體學唐賢一時名重大江南北晚年學易手錄易九
家注未成書尤與丹徒莊中白棧善棧故深於易者也
先生以母老倦遊侍養於家撫諸弟有恩義錢閣學桂
森主講江寧鍾山書院延先生襄校經古課卷學者翕
然稱善先生爲人耿介絕俗不與聞外事晚病風痺臥

牀褥閒猶手不釋卷卒年六十有八門人私謚曰文介先生

孫葆田曰余夙聞泰州有袁子文先生江北一學者也及是與先生季弟鏞遊得讀所爲家傳謂撫我則兄知其幼孤賴伯兄教養以至於成立按宋史稱曾子固撫諸弟於單弱中故稱爲孝友先生文宗南豐其行誼亦絕相似云

李母閭孺人家傳

鹽山李主事念茲之曾祖母閭孺人生則慈惠孚於鄉里沒而子孫守其教澤迄今環李氏所居無遠邇內外

宗族咸稱孺人爲厚德蓋距孺人卒時八九十年矣孺人考諱某閔氏故鹽山名族也當孺人始歸時夫家貧甚乃用商賈謀生孺人佐以勤儉凡數年家漸裕由是治田畝肆力農事積十餘年後其家居然富有矣孺人之夫曰惺菴府君以積勞年四十而病卒孺人兼理內外井井有法性喜施與凡濟老恤孤憐貧之事罔弗力爲爲之而尤不欲人知李氏在前明時尙多能讀書取科目及是日益衰替矣孺人乃命其子爲諸孫延師教之誦讀擇宗族子弟有材質者咸納塾中其後李氏子弟列庠序取科名者相繼不絕由閔孺人之教也其訓

子孫必先之以敬宗收族族人
有流徙者輒招徠安集
之其他貧窮無力者則鬪卹之
老幼給以衣食壯者量
能授資必使盡得溫飽而後止
故其沒也哭聲震巷中
至孺人孫曾時猶有親族相依
不去者諸老人談及舊
事往往泣下不止烏虜爲善者
不望報閭孺人以一婦
人而能感化鄉里且使其沒世
不忘若此非有純德懿
行何以及茲惺菴府君諱化才
一子福槐以幼病廢讀
孫三人靜川縣學生印川一名
深少棄學佐父理家事
映川縣學生曾孫幾人某某皆
治儒術念茲同治甲戌
科貢士與棣口爲同歲生一日
手家狀述孺人遺事請

葆田爲文以傳示無窮葆田遜謝不敏則再拜言曰念茲曾祖妣功德在李氏而不獲有司表其門閭以念茲官微又不得仰邀國恩貤贈曾祖父母於心歉焉惟吾子哀而鑒之幸甚蓋今制女子守節必年未三十喪夫者乃予旌表孺人守節時年逾三十矣於例不得達於州郡念茲故云

論曰自劉子政敘列女傳所載多古人嘉言懿行蓋所以彰內教正人倫而佐王化也及後代修志乘者獨稱節孝曰列女而婦人之有賢行足爲壺則者或不具於義微矣觀李君所述閭孺人教子力學惠及宗族雖古

所稱賢媛淑德何以異乎而天亦卒祐其孫子使食報於後人有世道之責者亦惡可使其無傳哉

李氏二節婦合傳

節婦劉氏恩貢生劉人豪女適同邑太學生李一諤次子絢年十七于歸十九歲夫死守節事姑如事其母姑以壽終翁老矣重聽而多怒二子侍左右稍不如意卽撻責惟節婦善會翁意奉事無違鄉里以孝聞長姒岳氏早卒遺二女節婦教養如己出其兄公繼娶姚氏又卒遺三男一女節婦撫次男惟棠爲夫嗣諸子皆視節婦如母不自知其無母也光緒□年有司上其事旌

表如例節婦孫氏太學生孫曰述女也適縣學生李一
聰子縉與李絢爲從祖父兄弟婦年二十七夫病腰癱
朝夕奉養無懈縉卒遺一男一女男九月女四歲耳節
婦事舅姑能得歡心男旣長名恆棠已能讀書有聲庠
序閒翁年七十以壽終姑老且多病恆棠方幼侍湯藥
惟節婦一人鄉里皆稱其賢光緒□年與節婦劉氏同
以節孝旌

論曰兩節婦所遭不同而卒皆茹苦含貞以完其志豈
非所謂純孝哉余離鄉久不獲從諸長老問鄉里懿行
軼聞今年夏閏孝廉大奎以書詣余京師屬爲節婦表

其行余以所述事稍略不能據卽成文會歲暮省墓至
濰顧念家室有感於懷因爲兩節婦合傳烏虜余文固
不足以傳節婦彼自有可傳者在皎然與冰霜爭潔可
也

胡節婦傳

節婦陶氏浙江會稽人父恩榮前河南汝州吏目氏年
二十歸同鄉前河南候補縣丞胡君楨之子友衡爲胡
氏冢婦性和婉事舅姑能得歡心與夫同志舅姑皆稱
其賢光緒三年中州大稜縣丞君以辦振積勞卒家中
食指繁朝夕幾不能舉火友衡則悉委家事於婦獨身

遠遊以謀衣食氏於時拮据支拄典嫁時衣供甘旨事
姑並撫諸幼弟內外得免飢寒如是者積四五年及友
蘅得疾輿歸氏侍湯藥衣不解帶每夜深焚香籲天願
以身代無何友蘅卒痛不欲生姑勉以大義乃強起帥
事如素當是時氏年僅二十有八無子又數年夫弟之
子啟純生乃奉姑命立以爲嗣以養以教今旣成立矣
姑太夫人已於前歲卒節婦守節逾二十四年鄉人宦
中州者咸重其孝行乃爲具牒請 旌表如例

論曰予與節婦之夫弟巽青善巽青每言昔歲遭家多
難母氏劬勞微兄嫂某幾不得存活又言節婦生平無

疾言遽色其事親可謂先意承志嗟乎孝本庸行然未有不孝而能矢節者至婦道尙柔不幸而以節著則往往有陽剛之性乃節婦獨異是易曰坤道无成而代有終如節婦者可以當之矣

節孝王氏傳

吾宗居福山者有宮莊太學生孫文澄其子曰盛儒娶同邑奇山所鄉飲大賓王欽之次女年十九來歸克盡婦道二十三歲而夫歿氏痛不欲生旣念舅姑在堂而盛儒無兄弟且身有遺腹天其或者不終絕孫氏血食於是含淚飲泣孝事高堂門以內米鹽瑣細之事悉一

身任之及彌月而生子男也恩勤撫育以養以教其後
舅姑相繼歿喪葬莫不盡禮鄉人以是尤欽其孝行子
名德銘今既娶婦生子矣氏善治家以勤儉爲教家益
熾昌會族中修譜將公舉其行請有司以聞得邀旌
表而屬予爲文以傳後世

論曰古人謂死節易撫孤難當氏初喪其夫煢煢在疚
豈知身果有嗣哉獨以一念精誠幸邀天眷孫氏宗祀
不絕如綫而卒之仰事俯畜至行無虧使人稱爲節母
稱爲孝婦易曰坤道无成而代有終其氏之謂與

漪蘭館詩集小傳

周君□□有淑女曰□□小字韻仙生而穎敏端莊好讀書七歲父授以詩輒能吟詠偶有所作援筆立就所讀書過目不忘尤篤於天性舉室稱其孝恭年□□歸江陰繆氏夫婦倡隨相得也不幸以□疾卒年甫二十有三遺稿僅存十之一二其家哀集所得古近體詩若干首題曰漪蘭館女史遺集將付諸梓以傳於世余與周君爲世交素知其女賢女嘗見余所作陸貞烈傳愛其詞臨卒謂家人曰吾父友孫先生善爲古文吾死後能得其一傳足矣蓋所志不僅在詩詞也余哀其意爲傳如右

論曰乾隆時大江以南有以詩才倡迪後進者至編爲女弟子詩風流所被亦遠矣漪蘭館女史儻聞風而興起者乎少承家學工於吟詠蓋天性也獨怪造物者既予以異常之質而不使其永年乃僅僅以遺詩傳也毋以彼蒼之忌才與可慨也夫

兵部右侍郎徐公神道碑銘

光緒二十五年夏四月癸未提督安徽學政兵部右侍郎徐公薨於太平使院於時內自京師外至遐陬荒域人無論識與不識聞之咸同聲歎曰中朝失一直臣矣而小人平時不樂公之彈擊者至此又皆以爲得肆其

志蓋直道之難容於世如此此公之子所以不求銘於
當代鉅公而獨以文字屬葆田者與烏虜葆田之文果
足以傳公哉公諱致祥字季和世爲嘉定人曾祖父諱
樟縣學生祖父諱經由翰林院編修官至分巡山東濟
東泰武臨道兩世皆以公叔父郝見官兵部尙書 晉

贈光祿大夫公父諱鄴道光二十三年順天舉人前官
兵部郎中 誥封光祿大夫前母袁氏母汪氏繼母朱
氏竝 封一品夫人兄弟三人公生而穎慧奇偉祖父
觀察公絕愛憐之讀書爲文有奇氣不屑屑於章句之
學年二十二與叔父郝同舉順天 恩科鄉試明年舉

恩科會試第一入翰林爲庶吉士是歲咸豐十年也
其秋 文宗駕幸熱河明年八月還矣公每獨居憂憤
思及國事輒流涕同治紀元公叔父成進士殿試第一
授翰林院修撰公亦以是年留館授編修越三年丁繼
母朱太夫人憂服闋擢詹事府右中允九年秋偕餘姚
朱公典山東鄉試十二年秋又主浙江鄉試號稱得人
今上御極之初公循分盡職嘗預分校禮闈凡數遷
而至內閣學士光緒五年奉 命視學畿輔未終任而
以丁父憂去職公於是時哀毀骨立又自以三世受
國厚恩父子同居清要苟不能有所建白何以對清時

而貽令名及服除再補內閣學士攝禮部左侍郎遂上書極言天下事是時山東屢被河災會是時議行新政公獨疏爭以爲國家經費有限宜急修河工以奠民生而罷諸不急之務其語激切遂奉旨嚴議鐫級而公亦以此名震天下朝廷知公忠直無他未一年起官太常寺少卿公益感激圖報先後章數十上皆能言人所不敢言者章或留中不報故人亦莫得其詳而籍藉在人口者最後有糾彈湖廣總督張公一疏識者以爲此尤可見君子之無黨云自今上親政後公每遇事陰爭上亦知公忠誠由太常寺卿一歲三遷至都察

院左副都御史十五年秋典福建鄉試明年會試知貢
舉士論翕服又明年秋典廣東鄉試星輅幾徧嶺嶠矣
而公以爲人臣爲國求才尤在以身示則其由宗人府
府丞轉副憲也在任三年丰裁峻整臺規肅然適公叔
父遷左都御史乃改公大理寺卿而是時公實有憂慮
山積一疏極論民生之蹙吏治之壞士習之囂官方之
靡凡數千言其語多見采納蓋上之知公深矣會甲
午春浙江學使陳公入爲順天府尹乃以公提督浙江
學政而是年朝鮮事起自秋至冬大兵戰輒不利公雖
校士事殷每憂憤太息復於其閒薦保文武人材及明

年和議已成公上書以爲方今急務首在進君子退小人且國恥不可忘武備不可弛其語斥大臣尤切聞者亦無如何也旣任滿宜受代 朝廷以公善教士乃更拜提督安徽學政之命論者或爲公惜而公視居外一如立朝始終不渝其志方羣小亂政法令紛更天下匈匈不安公按試列郡寓養於教一示以鎮靜並疏請舉行 經筵以正 聖學而朝政清明公特被 優寵晉擢兵部右侍郎於是人度公不久且大用矣而公見 聖躬違豫 皇太后深宮焦勞大臣唯阿取容莫肯爲 殿陛盡言者益深憂憤乃於歲終具國本二疏專弁

齋呈今年春以書諭葆田曰吾以獲咎之人蒙 恩起
用復躋卿貳無補 聖明當言而不言益慙顏無地矣
近有 母慈 子孝並廣育皇嗣二疏此滌菴與子所
屢以爲言不敢以告人幸勿宣露也滌菴者公典試浙
江所得士夏震武字也已而疏上果留中不下烏虜公
今逝矣葆田所知者止此其他蓋莫能詳也公以文章
受 三朝知遇其所欲盡忠以報國者亦不僅意在於
斯而遂止是豈其中果有憂憤不自釋者耶抑天固不
欲留我公以終彌成 聖清之休治耶吾知公雖逝其
心則如前代范景仁呂獻可諸賢不能一日忘天下也

必矣然則世第以直臣目公又豈公之本心哉公爲人磊落光明與人言必盡其誠遇門人無賢愚皆愛厚之故所至尤能得士心既沒而遠近赴弔者常數百人公生於道光十八年十月十一日享年六十有二娶李夫人子二鼎襄廕生候選中書科中書鼎康爲公少弟後女二壻濟寧孫榕定遠何炳瑩鼎襄等旣扶喪歸里乃卜以其年某月日葬公於某原葆田敬敘公平生歷官大節其細行則附著之銘銘曰

徐公之浦篤生哲人克冠多士爲世名臣屢蹶不躓其氣愈伸司守壇壝典禮恪遵外夷無禮封章上陳虜雖

驕悍亦莫敢噴河決桑乾飢民襁負公獨惻然傷如疾
首募貲萬金信及朋友以活萬人具饘餽口陰德雖多
辭功不有星軺四出行歌雪柳視學兩浙先正是程奇
袞必警公則生明尤憐貧士廩食均平再加月試法備
糊名嚴處各郡士氣英英載移皖江文風丕變按試潁
州適逢寇亂親見流亡食不能嚙慨捐千金招徠民賤
士亦感興下帷講貫凡此嫩行皆公末節溯惟生平一
腔熱血持躬蹇蹇惡彼泄泄止酒不飲擊壺欲缺慷慨
上章有淚如瀉胡天不弔使星遽沈忠懷耿耿江水深
深前星未曜戎氛日侵職闕誰補大寶有箴敬告在位

無負公心

國子監祭酒王文敏公神道碑銘

烏虜庚子京師之變可謂主憂臣辱主辱臣死時矣而當此之際能皎然不欺其志以身殉國爲斯世振綱常且以一門忠烈荷褒寵於當時中外之人莫不稱頌尤未有如 欽命團練大臣國子監祭酒王公者也公諱懿榮字正孺一字廉生福山人祖兆琛嘉慶丁丑翰林仕至山西巡撫父祖源咸豐己酉拔貢由兵部主事改官知府選四川龍安府調署成都府知府特擢成綵龍茂兵備道署四川按察司使公自幼性情篤摯讀書輒

過目不忘年未冠隨父官京師觀政戶部聲譽大起諸公貴人爭欲出我門下而顧一不屑貶就同治元年應順天鄉試試卷已擬魁選旣而以微疵見抑至十二年始中副榜第一座主吳縣潘文勤公尤重惜之光緒五年己卯舉順天鄉試明年庚辰成進士入詞林當是時公年三十有六矣又明年辛巳入蜀省侍兵備公旣還都散館授編修因益講求經世之學公爲學不分漢宋門戶尤篤嗜金石文字得同鄉劉燕庭方伯所收藏頗富與濰縣陳壽卿學士商訂古文書疏往還不絕而常熟翁公與潘文勤公咸推公爲博學多識公於書無所

不窺而於古今奇字尤善悟視近代通儒所得獨多蓋
天性也丙戌丁父憂服闋入都供職癸巳 恩科典試
河南歸囊僅餘千金以奉高堂曰此稽古之所獲也性
詼諧與常人語輒戲笑怒罵獨談至忠孝事則掀髯抵
掌聽者忘倦以是人多喜就公嘗言爲翰林必當供奉
內廷及甲午 大考翰詹蒙 恩特取一等旋 召
入 南書房行走未幾復奉 命署國子監祭酒而適
會中東戰事急公上疏請回籍辦理團練以爲聲援奉
旨馳往並頒發饟項五千金前此所未有也公因馳
至登州周歷各州縣不避勞瘁是時公母謝太夫人適

避難金陵和議旣成謝太夫人亦返里公因請假省親
仍繳還饗項又辭東撫李公餽贖千金而以私財散遣
所調哨弁各員曰吾媿未能爲國家禦敵敢虛糜度支
哉先是公長子崇燕歿於京師遺孤福坤甫□歲隨母
張氏亦於是時歸省謝太夫人因留養里第張氏今豫
撫豐潤張公女也孝恭肫誠事重慈尤能曲得歡心公
旣回京覆命獨荷 聖眷優隆是歲補授國子監祭酒
丙申春丁謝太夫人憂匍匐奔喪成禮嘗語次子崇烈
曰吾不能孝養父母今事親事畢吾當致身於 國矣
公爲人坦白平日不問家人生產至購買書畫古器則

典衣質物亦所不計故官日崇而貧日甚服除再補國
子監祭酒諸生得其指授者皆相勉爲實學議者謂自
治公麟盛公昱而後得公而三皆不媿爲太學師也公
直內廷旣久或奉 旨鑿別宋元書畫或呈進異本經
史子集或有時奉 敕書於私第則益加敬慎前後三
爲祭酒以會典館編校敘勞加二品銜至庚子夏遂與
李侍郎端遇同拜團練大臣之 命公於 召見時面
陳拳匪無法紀情狀 朝廷始知義和拳爲亂民不可
用而泰西各國已聯軍深入內地 國事不可爲矣初
公所居第有井穴深而口狹公命匠斲口使大別爲橫

石於上七月二十日公猶呼宣武門出至團練局而是日敵兵已入齊化門甘軍潰散京師亂練勇倉猝不能成軍公薄暮入城次日早敵兵已攻東安門公徘徊庭院日晡時傳聞兩宮鑾輿已西狩公慨然曰吾可以死矣吞金錢二及仰藥皆不絕乃書絕命字於几投井而死而公繼配謝夫人與長媳節孝張氏婦亦同時先公殉焉時七月二十二日也越數日張侍郎英麟始率人出井中尸面目如生乃爲置薄材成殮當是時敵兵猶充斥太學諸生乃相率服短衣泣拜於第敵兵問知爲忠烈之門亦相戒勿犯烏虜得此於外夷蓋尤難矣

公有幼子崇煥甫九歲及張氏所出孤孫甫十歲皆先時爲僮僕攜往他所故得免於難亂定豐潤張公使人微至京師探得其實事聞行在 詔追贈侍郎銜 賜謚文敏準建專祠謝氏張氏皆附祀又 賞給嗣孫福坤主事而公次子崇烈爲公弟後者以直隸候補道先奉公命由天津歸里至是閒關赴喪扶三櫬歸葬葆田與公爲知交聞公殉國偕同人設位而祭其詞有曰以公身爲天下師又兼練兵大臣固萬無倖生之理而某等所尤心折者公乃忠烈節義萃於一門其後恭讀諭旨乃與私撰文字正同先是公嘗與人書謂身後易

名之典當得文忠文節及隨扈大臣在西安倉卒進擬
乃獨括公生平以爲好古不怠而公危身奉上與艱危
莫奪之忱反隱而事後追論尙有謂公可勿死者人心
陷蔽至此此昌黎韓子所爲致歎於三綱淪而九法斲
禮樂崩而夷狄橫也公所著文字皆未就獨奏稿尙存
卒時年五十餘先娶黃夫人生子二崇燕辛卯舉人次
卽崇烈癸巳舉人女一適今南汝光道吳封繼配謝夫
人生子崇煥今年十五矣公旣葬六年崇烈見葆田於
河南泣曰先公墓碑未立願得有道者爲之詞乃爲銘
曰

兩儀既奠君臣分定事三如一道無逕庭君辱臣死大
義攸存地維以立天柱以尊胡古胡今所重忠烈爲稽
紹衣爲臬卿舌偉哉王公乃天下師奉命團練艱危
不辭鑾輿出幸迫於強敵世危時窮臣生何適在北
宋世有李侍郎一死報國克服氏羌公今繼之義感婦
女曰謝曰張節烈同許天子曰嗟予有良臣建祠附
祀用式兆民名節無虧炳若日星千秋萬歲請視此銘
贈太常寺少卿高府君神道碑銘

畿南有賢人曰高君曦亭其立身有本末其爲學一本
乎先儒而尤致嚴於出處進退之際葆田聞其名而不

得見蓋十餘年矣光緒丁未冬有友自綏遠城至奉君
書及所爲先公事略與太夫人事略各一冊以告曰某
與吾子夙相知而未獲一會面今願竊有請焉某不幸
年三十有四而先公見背越三載始通籍於朝備官詞
垣甫五歲吾母陳太夫人又棄養雖處憂患之中輒追
念吾親生平敘述一二思得當世有道而能文者爲之
表揚以傳諸不朽遭逢 聖天子推恩錫類往歲再遇
覃恩先公得因某官卿僚加級進秩 誥贈資政大
夫先母 晉贈夫人而所謂飾幽表墓之文至今久未
克立大懼先人行誼將遂湮沒弗彰惟吾子哀而鑒之

幸甚葆田媿乎其言然莫能辭也乃爲撮其大要俾揭
諸墓道之上按狀府君諱靜字尊誼別號慎菴世居寧
河之北塘自其四世祖以儉約起家曾祖射斗益恢舊
業以好行其德稱嘉慶元年與恩榮千叟宴祖耀堂
爲縣學生尤喜施予每傾囊以助人父敘五生而靈粹
嗜學早世母陶氏矢節事姑以孝聞咸豐初膺旌表
府君生二歲而孤七歲就塾不待督責讀書目數行下
他人莫及也稍長從津門張采軒先生遊每聞師說輒
心契幼時質好動采軒先生爲改名並命以字遂終身
沈默端謹常慨然以古名儒自期與中表陳鷺賓仲鸞

相切劘於學李文節公按試畿輔得其文大加賞異爲人誠樸惡奢麗一羔裘四十年垂老不易先時家故饒於財及是先業中落又爲某商侵蝕府君置不問迺爲童子師資束脩以自給於書無所不通尤好爲古近體詩初沈浸於漢魏後學杜韓晚益沖澹近陶韋同治初有欲續畿輔詩傳者屢索稿不與曰吾尙覲有進也以道光二十四年舉於鄉至同治元年壬戌大挑二等候選教職迨母夫人歿遂絕意科舉不復與會試初應鄉舉時里有鬻其婦者府君爲出貲以償所負得不行是年適舉於鄉人以爲陰德之報或問府君則對曰訛傳

也其居鄉有盛德人莫敢干以私然遇人言行有失必
諷諭之使改而後已至其教子弟則未嘗稍寬焉平生
不與官府交所教士類多純篤寧河士習爲畿輔東南
冠由府君啟之也同治十二年六月二十五日卒春秋
六十有四其後部選容城學訓導而府君不及見矣所
著有周易參考二卷又讀書隨錄七巨冊自離騷諸子
百家詩古文詞下逮駢體文靡不選錄其所爲文主闡
明義理而不詭於法子孫皆承其家學故邑人修縣志
者以府君入文學傳而順天府志則采其懿行列諸先
賢傳中非溢美也夫人陳氏考諱德明爲蘆台巨族于

歸時及事祖姑佐姑代饋得堂上歡心時府君勤於學
不問家業有無夫人典嫁時衣釵備甘旨供祭祀必豐
必潔所居舊宅敝而固或以厚貲餌之輒峻拒弗許人
或以貧乏爲慮則曰吾家父子讀書好善方隆隆起何
憂貧也生三子一女季子幼殤女適鄭子璧內教綦嚴
子有過必怒責之嘗曰少年艱苦福之基也及次子入
翰林長子選授教職訓之曰吾不樂汝富貴第願汝恪
供臣職毋貽先人羞吾志慰矣光緒六年卒春秋六十
有四子二長棠恩官望都縣教諭候選知縣直隸州知
州用次賡恩曦亭其字也光緒元年乙亥 恩科舉人

丙子 恩科進士改翰林院庶吉士歷官翰林院編修
司經局洗馬簡放陝安兵備道庚子春 內召 弘德
殿行走授太常寺少卿是年秋隨 扈至西安因引疾
求退此所謂不苟於出處進退之際克紹其家學者與
孫二曾孫二其他則曦亭所述詳矣葆田竊攷 本朝
令典子孫官九卿者其祖父不得請入鄉賢祠蓋以防
人世之私託然而若高府君者其行義既爲鄉人矜式
今必不獲祀於有司然已受封贈至二品又爲府縣志
載其行實足可以風世而勵俗獨予區區文字未必能
信今而傳後又奚足爲當世重輕亦聊以慰賢者無窮

之思而已矣乃爲銘曰

高爲著姓實居北塘奕世載德厥後宜昌篤生偉人未
斲失怙母訓是遵讀書好古及冠而試屢冠其曹矻矻
爲學天挺人豪初時好動旋改名字師訓善承晦菴是
視旣登賢書尊聞行知教授生徒十載京師博觀約取
與道大適詩學晉唐講經奪席亦有明訓外圓內方君
子小人道分陰陽善不近名學不苟仕撰述滿家以貽
孫子矧有賢配拮据相將甘旨是供時典釵璫爰生令
子學繼容城節行克敦實有令名猗歟府君當代典型
百世而下請視此銘

文華殿大學士贈太傅晉封一等男爵瓜爾佳氏文忠

公神道碑

公諱榮祿字仲華瓜爾佳氏其先本蘇完部長有諱費英東者佐太祖高皇帝締造鴻業有大勳勞崇德中加封直義公順治初定爲功臣第一雍正中加封號以宗子承襲世德流衍公其苗裔也祖莊毅公諱塔斯哈以幫辦大臣歿於喀什噶爾之役父勤勇公諱長壽涼州鎮總兵咸豐初與兄天津鎮總兵武壯公諱長瑞同日戰歿於廣西文宗顯皇帝下詔褒卹稱其忠貞世篤公以門蔭起家觀政工部顯皇帝識公名特擢銀

庫員外郎嘗 詔至軍機處詢問祖父死事狀 帝爲
動容者久之而是時執國柄者欲公出門下公辭不得
幾致傾危未幾而天津兵事亟 聖駕狩木蘭恭忠親
王奉 旨設巡防處檄公總其事和議成同治改元

醇賢親王調公充神機營翼長是時公已薦擢京堂三
年率建銳營追奉天馬賊至鐵門關敘勞加副都統銜
七年與平捻匪張總愚於畿輔 賞加頭品頂戴擢左

翼總兵授內務府大臣十三年冬 穆宗毅皇帝升遐

公以內務府大臣與 御前大臣軍機大臣同被 顧

命公奉 兩宮懿旨迎今 上於醇邸入承大統公獨

顓請 嗣皇帝生有聖子卽承繼 大行皇帝爲嗣於
時 兩宮爲之感動允如所請光緒四年由步軍統領
拜工部尙書且駸駸大用矣而公遽引疾求退杜門卻
掃折節讀書著有世篤忠貞錄諸書屏居十餘年再起
爲都統 簡任西安將軍以旗民駐防西土者生計甚
艱乃於名糧外月給孤寡錢千其少壯者令練習洋槍
以壯軍威二十年 皇太后萬壽公入都祝 嘏適東
瀛戰事起卽留授步軍統領會辦軍務明年和議成後
授總理各國事務大臣公因疏請變通舊制改習鎗礮
又請設武備學堂二十二年以兵部尙書協辦大學士

奉 命察閱蘆臺武毅軍小站新建陸軍二十三年會
同刑部審辦大凌河馬厰案都人士咸稱其公允二十
四年戊戌夏四月授直隸總督兼北洋大臣節制各軍
會有欲得公兵權者小人謀亂國政是年秋八月 皇
太后再臨朝聽政公遂奉 命入爲軍機大臣贊助
綸扉 天子以聖躬不豫軍國事一倚公爲襄理旋晉
文淵閣大學士管理兵部事務始公先後與文文忠寶
文靖左文襄李文正諸公遊各以忠誠相砥礪至是諸
公皆徂謝獨合肥李公與公爲國家柱石臣而李公歷
任疆圻公在政府不立崖岸於中外利弊獨洞見本原

力持大體不爲眾說所淆二十五年冬 朝廷議建儲
貳公因擬 詔旨以進其事祕而世莫得而聞也或謂
公嘗力爭不得云二十六年拳匪起畿南公屢請剿亂
黨保護各國使館而各國聯軍已入畿甸及 鑾輿西
幸公亦集隊南下至保定獨有力圖恢復之意而是時
大學士兩廣總督李公已奉 旨爲全權大臣同贊議
和乃亟 詔公至西安默定大計公乃力陳宗社安危
所繫凡敵人目爲戎首者皆得罪由是大局危而復安
明年冬扈從 迴鑾至開封羣意留蹕是時李文忠以
疾薨於京邸冬十一月 六飛入都萬姓悅服中外和

睦公之謨也公前掌兵部時建議仿設學堂以植人才至是乃建大學堂於京師而各行省所建設者爲高等學堂又爲科舉遞減法以冀羣材興起二十九年公以疾告薨繼公爲政者遂率意紛更而科舉亦廢矣公薨於癸卯春三月庚子是時 天子奉 皇太后展謁

西陵禮成閱武於保定得公遺疏乃遣員奠醑 賜諡

文忠 贈太傅晉封一等男爵 懿旨有曰盡心竭力

調和中外又曰獻納周詳有爲中外所不及知者則公之生平蓋勞可想矣 國朝勳臣得諡文忠者在康熙

朝惟輔政大臣索公乾隆一等忠勇公傅公道光以來

林文忠周文忠沈文忠三公則以危身奉上先後並得
美諡而中興名臣尤稱三文忠曰花縣駱公益陽胡公
鐵嶺文公所謂肫誠翊贊者實能同心同德至公與合
肥李公身後易名之典又俱出 特賜蓋尤爲不媿云
公初娶薩夫達夫人繼娶宗室故大學士靈文恭公女
庚子秋歿於河南彰德府側室劉氏生一子□厚年□
□歲從公西行返至華陰而歿公病革乃命以從子良
揆爲嗣 恩旨以四品京堂候補嗣爵女子二一適禮
親王世子一爲今醇親王福晉

鄭一泉先生墓表

先生諱作相字仲巖一字楚夫晚歲結廬於韓家山第一泉之側因自號一泉鄭氏自唐時居今日照縣地詩書仁義之澤歷千有餘年未泯先生四世祖諱曾述乾隆壬申 恩科舉人官河南濟源縣知縣以母老兄病辭歸遂終身不出著述甚富子若孫皆守其家學以訓迪後進先生生五歲而就塾不數年徧讀十三經旁涉詩古文詞居稠人中言動有法長老以爲異弱冠入學食廩餼旣而累遭父母憂以哀毀故遂致羸疾然能以義理自治遇有宗族鄉黨事皆力任其難終其身不倦咸豐辛酉捻匪自淮北至先生約族人爲入山避寇計

暇輒講論詩書弗輟寇退返里以教授自給同治丁卯
寇再至邑人以節義死者眾亂定先生偕同邑牟先生
廷輔搜訪節烈婦女二百餘人益以歷年守節婦爲數
八百有餘以姓氏上於有司得旌表如例是歲爲同
治九年庚午越三年壬申以歲滿貢太學光緒壬午猶
攜兩子應鄉試試卷出趙公國華房薦而不遇先生至
是躓棘闈者且十次未嘗稍形怨尤也然先生亦自是
不復應鄉舉四方從學者甚眾其教人以涵養德性變
化氣質爲先所手訂有辭文清讀書錄摘要呂新吾呻
吟語錄要又嘗集陳文恭公訓俗遺規若干條爲一泉

山房誠子編其言曰聖賢千言萬語無非欲人自成其
爲人得其本心以全生人之理聖賢無不可爲彼陷溺
者徒自絕於天耳又謂其子淑灼等曰孝弟忠信固不
易蹈反是則不足以爲人處患難時尤宜自立此正磨
鍊時也先生學宗六經尙書毛詩皆有手訂本尤嗜周
易著有易說揆方十二卷其大旨以爲易者聖人憂患
寡過之書道在陽統陰陰從陽用在陽制陰陰輔陽所
爲詩文門人請梓弗許嘗徇邑人請續修邑志以脫稿
甚速思增損成書未就而卒年六十二以道光八年十
一月五日生卒於光緒十五年正月二十一日鄉謚文

慤先生其門人丁郎中麟年屬予爲文表其墓予深知先生學宗篤實願生平未嘗相識惟見其邑中後進每言及先生無不以爲文獻所宗也旣而仲子淑煥來從予遊因益知其家世烏庠師道廢久矣如先生者使其得效一官以爲邦人士矜式其所造必有進焉者惜乎其以明經老也然而教成於一家而化行乎一鄉古之所謂鄉先生沒而可祀於社者如先生又何可多得哉

大挑知縣加三級畢君墓表

君諱茂昭字存樸一字靜山世爲文登人曾祖宿庚乾隆丙辰恩科舉人直隸清河縣知縣以君從兄承昭

官安徽布政使 馳贈通奉大夫祖所雋陝西涇陽縣
典史父以紱江蘇知縣歷署崇明丹陽金匱縣蘇州府
管糧通判 誥贈中憲大夫母張氏 誥封恭人生君

昆季二人君性孝友髫齡就傅與兄瀚昭共筆研出入
必借侍父宦吳中肄業紫陽書院從高南陔遊弱冠旋
坐應童子試邑侯歐西青奇其文拔冠多士補博士弟
子員科試食餼仍攜家抵蘇州益肆力於學問自左國
兩漢下逮唐宋大家文罔不研究尤殫心於天文地理
河道倉儲諸說條分縷析以蓄爲有用之學道光丙午
丁父艱哀毀骨立卒與兄竭力籌歸計事母備極色養

承奉無違門庭熙熙人無閒言及兄成進士分工部學
習君則家居經理敦睦族鄰外而酬應親故凡事之有
利於一邑者無不身與其間同治壬戌 詔舉孝廉方
正縣將以君應選力辭而止是歲 恩科遂中式舉人
辛未大挑一等分發福建以兄工部君年逾六旬不忍
遠離卒弗往光緒丙子東省大饑工部君與邑侯籌貸
振銀萬餘兩事後又勸辦社倉積穀君贊勦區畫之力
居多生平慕朱子社倉及范文正義田諸法嘗酌古準
今爲規條數則咸豐初勑捐穆子千餘斛置里中以備
凶荒又因先世祠宇湫隘與兄悉意經營置祭田若干

畝新其棟宇以妥先靈與人交不設城府尤善處人骨肉以婉辭正義告之聽者無不心折樂從自光緒十四年工部君辭世君悲哀逾節常忽忽若有所失竟以十六年五月十五日卒享壽七十有七所著有義易片玉禹貢輯解麟經紺珠麟經擷腴魯論輯解增補校正鄉黨圖考渾天儀圖說天戒錄社倉雜議訓蒙瑣言皆待梓棫田於辛未應禮部試始與君相識至庚辰春君年幾七十矣猶橐筆負笈與各直省舉人會試南宮其意氣可謂壯哉君鄉居不能盡施其所蘊然而仁讓勤儉之風有足多焉配某氏二子皆先卒長孫贊序述君行

實屬爲表墓之文昔許魯齋謂學者治生爲先世多議之觀於君之孝友傳家而能存心利物士之居貧自守以節介相高然卒無身後之稱者亦可以鑒矣光緒十八年冬十月表

興化縣知縣張君墓表

故興化縣知縣濰縣張君以光緒五年閏三月 卒於官享年五十有五其孤僑旣扶喪歸里葬於城南高家樓莊北原乞吾友張君昭潛爲銘幽之文越今年冬予以事至濰僑等乃持狀請予表其墓君諱兆楷字叔則先世由直隸滄州遷山東濰縣世以孝友傳其家至君

兄弟而益顯曾祖諱某國子監生祖諱某縣學生父諱
某國子監生皆以覃恩累贈光祿大夫曾祖妣譚氏
以節孝旌祖妣劉氏孫氏皆贈一品夫人母宋太
夫人嘗拜懿矩頤齡扁額之賜生君兄弟四人伯兆
棟官終福建巡撫仲與季皆未仕君年十四丁父贈
光祿公憂哀毀骨立族中長老咸歎其天性純篤事祖
母事母並得歡心年旣長猶作孺子慕以廩貢生中咸
豐己未恩科副榜同治壬戌恩科舉於鄉辛未應
禮部試中式貢士未與廷試而歸始君鄉舉時有捷
報至家人喜相告君聞就寢如故先是伯兄守鳳翔迎

養太夫人至陝君奉母命應秋試不得隨意戀戀不能
釋也既聞狗匪擾陝西鳳翔被圍太夫人輿次山右平
陽君馳赴省視嚴寒載塗肌膚皴裂既奉太夫人至陝
與伯兄同侍晨昏色養匪懈是後兄以禦賊功受朝
廷知遇疊膺簡命由江蘇布政使晉督漕運遂以兵
部侍郎都御史巡撫廣東家亦益亨矣而君素履自如
及捷南宮初無意於仕進太夫人命之曰朝廷設科
第以待士奈何受其名而不食其祿乎君乃出應甲戌
殿試既賜同進士出身以知縣用乃援例待銓逾年
選授江蘇興化縣知縣先之粵東省太夫人於伯兄節

署太夫人諭以大義乃奉檄赴任值歲大旱蝗起君躬親督捕又捐俸以濟振民困得蘇明年運河水漲君率眾急赴高郵壩晝夜堵禦水旣平則又躬歷鄉社講水利修隄防日不暇給竟以是致勞成疾至明年春遽聞太夫人訃一痛幾絕病遂不起邑民震悼如失慈父母比喪歸老幼奉香泣送者不絕於道君與伯兄並起家進士伯兄由部曹歷外任爲人嚴毅遇事能持大體正躬以率僚屬君賦性和易其爲學好講求禮意居恆淡泊寡營人有急乏周卹之雖千金不吝其卒也尙負官累若干巡撫公自廣東遣人經紀其事喪乃得歸嗟夫

州縣之難爲久矣昔聖門諸賢曾閔皆以孝稱閔子辭
費宰曾子雖仕而世不傳其政事子游子夏固文學士
也一爲莒父宰則聖人戒其欲速見小利一以絃歌化
武城聖人始聞而笑之晚近世塗民耳目其出而從政
大率非爲利卽爲名耳君子學道則愛人觀於君之實
心爲政而不獲竟其用與前代循良比隆不亦深可惜
與君有子三長卽僑次口次口並孝謹有父風孫三毓
瑾好學而能文應科舉有聲循吏之報於是乎在光緒
十九年冬十一月表

河南候補道兼襲騎都尉又一雲騎尉吳君墓表

光緒二十二年十月乙丑河南補用道吳君卒於寓邸
春秋四十有七無子遺命以從兄之子叔榮爲嗣於是
中州士大夫咸往弔哭又爭賻其家有聞知者咸歎曰
此忠節儀徵吳公之嗣也天胡爲而不永其年哉君諱
丙湘字次瀟初名進泉生於雲南總督節署故又字滇
生父文節公諱文鎔生母王氏以君貴 贈夫人君生

三歲而文節公殉難於湖北黃州先是文節公奉命移
督湖廣不欲以家室自累遂命君母子入蜀依叔父通
奉公於敘州時通奉公無子撫君如己出而君適長兄
曰養源以任子觀政刑部兼襲世職同治初歿於京師

無子又數年君長始承襲如例君天性孝友事母王夫人怡聲柔色曲得歡心母偶怒輒長跪自責居母憂自初喪至葬坐臥不離柩側事寡嫂尤盡禮尤加敬焉嫂卒於母家君親迎其喪歸並求當世能文之士表其節行自文節公卒後不十年而刑部君繼之又數年而通奉公亦卒家世清貧居無恆產又迭遭喪故門祚衰零獨賴君支拄其閒夙夜兢兢罔或失墜人咸曰吳公有子爲文喜駢體沈博絕麗非時人所及在庠序日有聲顧七試鄉闈輒被屈光緒十四年始以廩貢生舉京兆試明年成貢士遵例由府同知得道員十六年補應

殿試 賜進士出身 朝考二等呈就本職分發河南
補用君於是年四十有一矣初娶黃氏繼娶錢氏某官
某之女生女一適望江倪某始予先大夫嘗事文節公
爲屬吏黃州之役公檄先大夫勸捐黃陂孝感獲免於
難先大夫每爲予兄弟言隨公守武昌及出師事輒流
涕不禁也同治戊辰己巳閒君遊湖北先大夫方需次
省垣聞君至喜數其往還因命予兄弟見焉是時君年
未二十詞氣儒雅進退雍容其後先大夫及予兄弟兩
次過揚州皆嘗訪君或遇或不遇至光緒二年秋予奉
先大夫之喪過揚君至舟中弔唁意氣懇懇慙慙自是

遂別去後十餘年嘗再見於君從兄寧國府署又三年而君以道員發河南予適從予弟任所還至汴又再見焉每見則君學益進養益純尤好諮訪當世忠孝節義事嘗以寶應孔烈婦殉夫事略詢予思爲廣求詩文以表章之所輯有傳硯齋叢書初集續集皆搜采前人遺稿未付梓者其用心遠矣烏虜孰謂君遂止於斯耶君之卒也予已來祥符數日竟不及握手一訣比君喪歸其從弟少蓮以所撰行狀屬予爲表墓之文予辱君知最厚誼不可辭獨念文節公以忠孝大節炳著天壤君承其蔭宜得厚報乃以超世之才而僅獲一第竟不克

大展其志且又使之抑鬱以終將所謂蒼蒼者其好惡
信與人殊耶抑自古忠臣義士其身死嗣絕而名乃愈
昌者天固別有意存於其閒耶烏孝當文節公赴義時
惟知以身報國耳固不計君之成立與否而君以
孤子嬰兒不藉父兄之勢卒能自振拔致科名卽不幸
中道以殂猶能使人人咨嗟歎惜其視世之富貴而名
磨滅甚至爲世詬厲者所得又孰爲多寡輕重哉予爲
表著一二君亦可以慰於地下矣

前濟寧州學正呂府君墓表

呂府君諱傳誥字星使一字蕉兩世爲萊蕪人生而奇

偉英異少長好學力行異常人年十七補博士弟子員
咸豐五年與兄子憲春同舉於鄉累上春官不第同治
元年大挑二等其仕嘗爲濟寧州學正矣又嘗以守城
功加光祿寺署正銜而以子憲瑞貴誥封朝議大
夫十二年癸酉八月卒於湖北黃岡縣署至 今上光
緒二十年憲瑞官河南許州直隸州知州 欽加三品
銜恭遇 覃恩得 晉贈通議大夫距君歿時蓋二十
有二年矣許州君於葆田爲父執以同治元年進士分
發湖北卽用知縣歷任黃陂東湖江陵漢陽蘄州所至
有循績旣除府君喪謁選得河南登封知縣調補滑縣

會吏部推升禮部精膳司主事京察二等以直隸州知
州發河南補今職去年秋闈葆田遊大梁乃手書府君
行狀屬爲表墓之文其略曰萊蕪自道光九年潘子駿
先生聯舉成進士是後科第闕然府君幼承父志潛心
舉子業功苦益力尤思以振興文教爲己任邑有汝源
書院費久不敷將廢矣乃倡議集貲修齋舍立課程增
置膏火由是一邑人文奮起自咸豐乙卯至同治癸酉
每屆科舉邑必有人大率書院肄業生也方府君鄉舉
時自念先人棄養已十年不能早博一第以爲親歡輒
唏噓流涕不自禁生平志趣遠大與人交不設城府遇

有橫逆事恆返己自思先立身於無過而於人之譎張
爲幻弗計也其去濟寧州任因弟子員中有妄言招禍
者當道遽遷怒於君君處之夷然而尤有弭亂於無形
合邑蒙其德而人或不及知者當咸同之際郡縣皆舉
辦團練法旣未能盡善往往羣不逞之徒藉鄉練爲名
聚眾抗官小者亡身大者破家甚者禍發倉卒殃及一
邑類此者不可勝數也萊蕪有團長某嘗集眾於吐絲
口鎮議戶民應納錢糧悉歸各團以爲練勇費眾或是
其議呂府君聞之馳往爲陳利害厲聲大言曰誰爲是
謀者予當先鳴諸官治其罪遂拂袖起欲去眾皆悟事

不果行當是時幾致大亂其後他邑竟有以抗糧罪同
叛逆者烏虜此自君一事耳然三十年來士農工賈各
安其業優游歲月以享太平則君當時一言之力實有
造於人人其功德豈獨在一邑哉吾聞有陰德者其後
必昌觀呂府君之所以善於身教於家與其爲德於鄰
里鄉黨則天之報施於善人者愈興而愈未艾其不止
於是可知也配朱淑人與君同志雖富而能儉雖貴而
能勤嘗謂諸子婦曰吾家本寒素爾輩志之毋驕惰毋
卽於奢靡家人莫不服其教子二長卽許州君憲瑞次
憲珂附貢生候選縣丞孫三栻曾縣學生相曾候選知

縣榮曾幼曾孫二並幼呂氏自府君以文學興其家一
門羣從並列科第曰憲春前河南候補知縣與君同舉
於鄉者也曰憲秋同治元年 恩科舉人官江南六合
縣知縣曰憲和咸豐九年 恩科與許州君同榜舉人
官滋陽縣教諭曰憲棟前河南候補知縣與子季弟爲
同治癸酉選拔同年皆君所教植也今許州君又於其
鄉特立義塾以教育人才所成就甚眾可不謂善成先
志者與葆田始拜許州君於先人漢陽縣署至今忽忽
遂已三十餘年茲旣承長者之命義不敢辭又以與羣
從遊故得知其家世爲獨詳世之君子觀其詞之核實

亦可以信呂氏而昭來世矣光緒二十三年春三月表
前浙江金華府經歷陳府君墓表

陳君毓藻求表其先府君之墓今五六年矣會予以奔
走多故舟車往來久之將事狀失去今年秋于君仲范
復爲之請乃索得原狀爲敘其大略而歸之按狀陳氏
世爲曲阜人其後再遷至鄒縣宣村因家焉仍隸籍曲
阜世以詩書爲業府君諱開基字企韓一字少文本生
父倬章聖廟典籍有從父兄爲章官德平縣學教諭無
子以君嗣焉君生而清標玉立讀書目輒數行下所從
遊皆鄒魯宿儒自幼工書善繪事又喜爲五七言詩嘗

與顏書村孔問源杜小鶴諸人集孔辛普箕山園以詩
酬倡無虛日咸豐七年鄒縣大饑君捐貲設粥糜以食
飢民所全活無算未幾而鳳皇山教匪難作有姻婭任
某陷賊中君爲白於當道當道信君言事旋得釋而任
某家產蕩然乃依君以居歷五年如一日同治初元教
匪猶熾而豫徐捻寇連年北犯君乃命其家人避居曲
阜而身自留宣村練鄉團以遏寇且戰且守所居有巨
樓相傳爲 國初其先秉忠公築以避土寇者君復繕
治之遇有警避其中者免擄掠一鄉倚若長城次年教
匪平或勸君出仕報 國君亦以事親事畢納貲謁選

三年秋選授金華府經歷明年之浙江是時蔣果敏公益澧爲浙江布政使一見君卽以國士目之其年四月飭赴任六月檄署武義縣事時寇亂甫平百廢待舉君以積勞致疾遽終任所年僅三十有六配杜孺人候選訓導杜長宜女與君同志嘗脫簪珥助振饑及君卒後有官累獨忍淚搯拄始得扶喪歸教兩子讀書先後入邑庠兩子長卽毓藻次毓葵今爲附貢生毓藻以通判需次河南歷署溫縣項城滎澤知縣有政聲遇 覃恩誥贈君奉政大夫杜孺人 晉封太恭人太恭人嘗訓毓藻曰汝家自教諭公通籍三世受 國恩汝父爲

政未久齋志以歿汝旣身列仕宦遭際時艱必盡心民
事毋計及囊橐盈歉也毓藻奉命惟謹太恭人壽終時
年六十有一光緒十五年八月也距金華君卒二十有
五年矣葆田嘗從陳閣學梅村見君所繪花卉題者頗
眾閣學於君爲同宗兄弟行故稱曰少文先生其見重
於當時可知特惜君未大展其用又毓藻所述皆君居
鄉瑣事故揭其一二卓犖可傳者如此光緒二十九年

秋七月表

丙閣中書銜前卽墨縣學訓導王先生墓表

先生諱練字澄江一字達夫莒州王氏先世由江南遷

莒祖父以上皆隱居先生少失怙賴從叔父維周封翁
訓迪嗜學不倦年三十始以府試第一補沂州府學生
逾歲食廩餼同治九年庚午舉於鄉年五十餘矣是歲
並補行同治六年鄉試號爲併科王氏一姓得舉者二
十有八人而先生與兄子者實與焉故同舉諸君皆以
年丈事先生旣再應禮部試不第遂以教官終其身先
生性孝友母張孺人嘗遭危疾焚香虔禱立愈兄弟同
居無閒言生平慷慨喜施與赴人之難如恐不及當咸
豐同治間捻匪擾山東先生以諸生倡議築圩堡衛鄉
里巡撫使者丁文誠公勦匪過莒先生發私財助餼糈

文誠以急公好義旌之先是嘗以監修莒州城敘勞得
教職其後復因從軍湖北保加中書銜甲戌秋奉委署
卽墨縣學訓導在任八年振興儒術獎勵寒畯士有微
長譽之不容口所成就者甚眾光緒三年著生學署人
以爲祥謝事後又主勞山書院講席者八年先生居鄉
有盛德及爲訓導時值歲饑鄉里流徙至者咸有資助
復捐縑煮粥以食飢民遇邑中建試院辦積穀籌振款
無役不與又嘗捐巨金爲眾倡人皆踴躍樂從士民有
爭訟者先生居閒輒釋勞山道士某與居民爭田控案
十餘年矣先生至一言而訟罷邑人士感之爲懸額學

署曰以賢得民又就勞山上清宮爲位以祝其長生葆
田與先生爲鄉舉同年而先生長子者貴又與予季弟
同爲癸酉拔貢生及予連遭大故季弟以哀毀卒先生
聞知獨心傷嘗遇予萊州城中執手唏噓寬慰千言並
致賻焉予媿謝不敢當先生則情誼愈篤烏虜其於葆
田如此則其平日仁心爲質可知矣先生家故饒於財
以好爲義舉耗其世業大半晚歲廉修所入輒隨手盡
資用嘗窘乏怡如也人有負債不能償者取簿籍句之
曰吾子孫賢積財何爲否則徒滋訟端耳先生仲子有
雋才以少年夭折故不能無怫鬱而葆田自與先生別

於萊州不相見者十六七年第聞其子孫繼起克紹家聲因以歎爲善之必獲報而已及是先生之孫乃昌以庚子辛丑 恩正併科舉人應會試至汴謁予大梁書院以先生門人張紹价所爲傳屬予爲表墓之文距先生卒又十有二年矣先生卒於光緒十八年三月二十八日春秋七十有四所著壽菊齋詩文集藏於家绍价謂先生鄉舉時報錄者誤書王烈先生因自號師烈此蓋先生之寓言夫君子達而在上則澤被萬物窮而在下則一方蒙其德張君旣以此語著於傳觀於先生豈虛哉予故稍次傳語益以所知並述予兩世交親以見

生死離合之際其可感者如此而先生則洵可謂死而
不朽矣光緒甲辰春三月撰

直隸曲周縣知縣王君墓表

予既爲澄江王先生表墓之文會得年家子王乃祿書
云不孝罪戾滋深先考以去年十月棄養生平事蹟實
有不可泯沒者願託先生文以垂不朽棣田曰烏虜吾
同年中又失一循良矣表彰志行予其曷敢辭君諱希
賢字伯舉淄川縣人以同治九年庚午並補行了卯科
舉於鄉是科領解者爲萊陽王君嘗與君輩同肄業濟
南同爲丁文誠公所獎於時王氏一姓得舉者二十有

八人君其一也君少有膽略年十六值捻匪擾山東邑人倡辦團練禦寇青石關君以祖父年邁代之行無懼色同治初劉德沛據淄川爲亂王師屢攻不下君率鄉勇助官軍修濠壘事定不受賞勵志爲學鄉舉後五上春官不第光緒庚辰大挑一等以知縣分發直隸候補洵保同知銜並補缺後以直隸州用嘗權知隆平縣甫三月頌聲大作又代理柏鄉興頌如隆平以丁大母憂承重去官服闋乃循資補曲周知縣先委署雞澤縣事君奉檄喜曰吾今可迎養吾母矣而是時周太宜人適患頭暈行至中途輒返君亦自是有退志矣旣莅曲周

以勤慎自矢邑有巨盜劉鳳祥久捕不獲君用鉤距法
偵知所在一日託爲東行忽率勇返勦其穴遂成擒先
後獲夥盜百餘人置諸法閭閻以安值歲饑穀價騰貴
民艱於食而常平倉穀半腐爛君爲出陳易新捐廉俸
以蘇民困百姓便之在任四年百廢振舉暇則微服出
城與鄉農父老團坐序家人瑣事故一方民情得以周
知邑故有李公祠李公北魏時爲曲周令得民心亦淄
川人以君爲生同鄉治同邑千餘年實後先輝映也初
君去雞澤時邑民餞送者直至曲周境其爲民愛戴如
此戊戌歲以終養請曲周之民誤傳爲曲周事註誤聯

名數百人詣府懇留及告之故始釋然君歸里後足不
及城市縣令三易其人未嘗一通謁又二年而丁周太
宜人憂服除或勸之出君不應有子三人長乃祿庚子
辛丑 恩正併科舉人克承君志次乃禮乃祺皆庚午
以後生又有孫男四人具詳乃祿所述家狀棟田與君
同舉後僅一再見忽忽已三十餘年壬辰癸巳間予數
遊直隸竊聞君治邑事頗詳己亥春在邯鄲縣署吾友
孔亦愚謂予曰伯舉以養親得請矣吾輩終年奔走何
爲者子聞言而自傷明年春而孔君謝世又明年冬而
予叔弟光州君亦卒皆不得竟其所設施其幸而存者

不肖如予方且從事文字閒以度歲月故於澄江先生
有生死離合之感而茲乃復聞君之喪此予所以不能
不爲之慟惜也雖然君之治行既有可傳而又能進退
裕如以孝養終其身身雖沒而名存廩廩然有君子之
風其視古循吏亦何多讓哉甲辰春三月表

許州直隸州知州呂君墓表

有循吏萊蕪呂君諱憲瑞以光緒二十三年秋卒於許
州直隸州任所予旣爲誌幽之文其門下士密昌墀復
爲作家傳所敘君治行略具矣越七年君之子相曾以
治郟縣有循績由大府入 奏傳 旨嘉獎明年調補

滑縣令滑故君所調補邑也未至而升遷禮部主事以去邑人旦夕望相會至克施有政以續前徽於是相會走書謂葆田曰先府君葬今八年而外碑未立不肖大懼無以信今而傳後敢并有請於先生葆田竊惟君由進士起家歷任湖北大邑政績可傳者固不勝書初任黃陂繼署東湖皆有能名是時君年甫壯耳旣而補授江陵調任漢陽皆附郭邑號稱難治而君措施裕如其宰江陵也以沿江隄防不固民慮其魚乃捐廉倡修督民興工身任其勞隄成而民不病知漢陽年餘吏畏民懷及去負債累甚重密傳所謂累公未有若漢陽者也

昔我先大夫嘗攝漢陽令卽葆田前誌所敘初與君相見時也先大夫謝事後亦負累數千金終其身竟未能清償蓋今世號爲首邑無不因應公致累其所由來者久矣而君以調署蘄州及黃岡乃稍能彌補宿債兼有贏餘因於故鄉設立義倉勸修義塾以成先志事具誌傳中及連丁父母憂服除選授河南登封值大祲撫集流民有實政及人其以直隸州知州分發河南也蓋亦以中州民風素厚有可因地制宜者光緒十五年莅任許州如緩徵糧期裁議漕費皆彰彰在人耳目耳而其立育英社以嘉惠士子又事神治民無不修舉以是膺

卓薦入 覲奉 旨回任候升而君已年六十有三矣
會有欲久署州缺者逾年君始復任明年遂卒七月某
日也而是時予叔弟方任開封首邑例得推升許州又
爲有勢者奪去其後予弟竟升補光州未三年亦以憂
傷勤勞卒於任所視君雖未獲遂其初志而宦成名立
有子象賢將終能彰君之績者其孰爲得失哉君之未
復許州任也豫省大吏奉部議擬仿山東覈減錢糧章
程提州縣平餘以佐國用而以其半予民君獨持論以
爲州縣官須稍使有餘足資辦公否則賢者無以爲治
不肖者益有所藉口以媵民且裁半予民徒歸胥吏中

飽耳不若令州縣量力報効無擾於民而官亦不至辦
公拮据與予弟議合大府聽其議奏行之自君卒後國
事益艱庫款亦日絀籌款者無善策乃卒議加收民賦
以致民情浮動變亂紛紛而卒無裨於國用故予表君
遺事獨賢君能識大體故所至能得民心使民歌思不
忘其以循吏稱也不亦宜哉嗟乎循吏不世見如君之
悃悞無華而以晚年偶攫末疾猶或以臥治見譏於俗
如密君述所聞道路流言其尤可慨也夫

知府銜河內李府君墓表

府君諱□□字筱坡一字午莊河內李氏其先世多隱

德父諱□□以縣學生考授太醫院御醫充醫學館教
習君亦精醫術始爲醫士游升八品吏目旣遭父喪遂
侍母家居服闋母許太夫人命改官湖北通判未久遂
引養歸許太夫人生君兄弟二人弟□□世所稱秋槎
太守也太守公以諸生從戎保至牧守官終廬州府知
府遇 覃恩加級封贈先代考妣皆從二品府君與太
守公友愛最篤在家食必同案終其身囊無私財太守
公性剛直爲曾文正英果敏沈文肅三公所奇賞歷官
皖北牧令政尙嚴猛府君每勉以寬仁太守公承督教
惟謹故所至有清廉名卒以循績上邀 綸褒名著

國史實府君有以成之也咸同閒同郡毛文達公奉
命爲團練大臣遣使延府君佐戎幕府君以母病新愈
不宜離左右辭家居十餘年勅立祠規宗族咸服其教
遠近仿行鄉俗以變無構訟者所居濱沁河尤留心水
利郡守采其議築埽培隄兩岸農田得免水患反資漕
漑屢占豐稔光緒三年歲大祲河內官紳分廠施粥府
君自備資斧周察各粥廠朝夕不遑每謂同人曰奇災
如此吾輩盡一分心冀挽回一分氣數慎勿率意從事
同人感其言皆敬慎無欺比災減而府君積疾已深矣
以四年某月日卒享年六十大府以君籌振積勞活人

無算入奏奉 特旨加知府銜 賜卹如例配任淑人
側室郭氏以節烈 旌子恩祔候選衛千總恩祥光緒
二年舉人濟寧直隸州知州今爲萊州府知府恩祔縣
學生孫六人萬基丁酉拔貢生餘皆習儒業葆田始與
萊州君相遇於張勤果公幕中知爲廬州太守公兄子
心重之其後十餘年又相見因出所述府君事實屬爲
表墓之文其所述嘉言懿行備矣又謂府君平昔教人
必舉先儒語錄有裨身心者冀以轉移風俗烏虜此其
所以承先啟後有非世俗人所能及者當丁丑戊寅間
河南北大饑使任事者盡如李府君何至使災黎失所

哉然府君於時家非有餘或諷其不宜動言濟人府君
歎曰必有餘而後濟人則人多轉死溝壑矣濟人要在
存心無時無地一言一動皆可有益於人其通達世務
多此類予故爲表著一二俾後世知府君兄弟父子爲
時聞人其孝弟忠信實有所承而當世以施濟爲仁者
其亦聞府君之言而知所從事哉光緒三十一年春正
月表

祥符王府君墓表

府君諱曜字玉亭祥符王氏其先浙江山陰人也 國
朝康熙初有諱爾錫者游幕中州遂家焉數傳至府君

生而穎異年六齡遭母憂哀慕若成人世父無子因立以爲嗣稍長嗜學不怠事父母與本生父咸盡孝養旣而奉父命改習商業又代季父司吏職從公藩署以勤以慎藩署事無小大悉待以辦治積勞由吏員洊保至府經歷適故人郭鎮軍寶昌駐兵秦中招作文案兼理糧餉隨軍轉戰山陝歷秦度隴以襄贊功保升府同知賞戴藍翎並加運同銜同治初擬呈請分發河工旣念父母俱年高情殷色養遂家居不復求仕進其後迭遭父母與本生父憂葬祭罔弗如禮鄉人稱之王氏家故貧暨府君以善治生不三二十年間稱饒裕矣然平

居飲食服用未嘗稍奢靡又每以物忌盛滿戒其子孫
至里黨有匱乏者不待告輒周卹之弗吝遇孤獨鰥寡
尤必盡其哀憐蓋富而能施其仁惠非特周及三族也
光緒丁丑戊寅閒晉豫大饑府君陰助義舉所全活無
算然不自以爲德嗣遇直東水災以捐助振款甚巨當
事 奏請給予樂善好施字準建坊里門人咸以爲宜
始府君由運同銜 例授朝議大夫遇 覃恩加五級
誥封資政大夫祖依仁考敏義本生考賢義皆得二
品 封典妣皆 贈夫人府君卒於光緒十四年六月
十七日春秋六十有三配魏夫人仁孝勤儉克稱同德

子希曾原名致和同治十二年舉人刑部候補員外郎
孫樹森縣學生工部學習郎中嘗從葆田遊以同里馮
編修所爲誌銘及員外君所述行實屬余表其祖墓余
觀歸熙甫氏三途並用議以爲吏員之在古本與士大
夫無別異迨後流品旣分士人往往不復肯詘辱於此
然如先朝尙書徐晞知府況鍾皆至顯用而因歎 國
家欲收用人之實效非大破因循之論不足以振作鼓
舞一世之人材今 朝廷事事求新又併農工商爲一
部使得如王府君者而任之其必能興事任力富國裕
民追迹三代兩漢之盛何至取法外夷而究莫得其要

領哉府君雖未獲治一郡一邑而其事親交友名實純粹沒而使人不忘非負絕特之資於學問閱歷實有所得者曷由至此余故掇其大要俾碣於墓道其他懿行則誌述備矣亦不敢爲溢美之詞庶異世知言君子知余文爲信而有徵云光緒丁未春二月撰

四品銜刑部候補員外郎王君墓表

故刑部候補員外郎王君諱希曾字沂泉原名致和同治十二年舉人先世由浙江山陰徙居開封故今爲祥符人曾祖依仁祖敏義本生祖賢義父諱曜三代皆膺二品 封典妣皆 贈夫人君生而風度端凝初學爲

文落筆卽驚其長老父資政公以善治生貲雄鄉里然君守家教未嘗染豪華之習鄉舉後再應禮部試不第遂入貲爲部郎蓋承父志欲盡天下之大觀觀 朝廷文章政事之美以成爲通德達才遊京師不數載甲申春聞母魏夫人疾亟請假南歸歸則已不及視含殮服闋因留侍資政公不復出資政公晚嬰末疾君左右就養無方適河決鄭州流離遍野君奉資政公命首捐巨款並以京員襄辦振務蒙 恩加四品銜 賞戴花翎未幾丁資政公憂至庚寅秋服旣除矣而以居喪時哀毀遘疾竟以是年九月十九日卒年甫四十有二元配

張氏繼配趙氏俱 贈恭人又繼配李氏山東歷城人
子樹森縣學生今以郎中分部學習嘗從予講學習爲
古文君與余叔弟鄉舉同年又與余同官刑部然在京
師時未相識及余比歲游大梁習聞君父子居鄉諸善
行其爲人稱道不虛也君幼從同邑王君啟綸學王君
成進士爲宰山西罷官後無屋以居君迎致館舍爲謀
贍資其風義多此類余於壬辰歲晤王君河北致用精
舍王君猶稱君爲偉士而惜其享年不永蓋是時君歿
已週年矣樹森旣請余表其祖墓因示余以其鄉人所
爲君之誌銘余更表著其一二節行嗟乎士之有志而

不獲顯其用者可勝道哉光緒丁未春三月撰

候選府同知杜府君墓表

君諱景渭字礪谿世居萊州府掖縣西南杜家村先世有隱德至君祖父皆以謹厚稱父諱鏐 誥贈通奉大夫予嘗爲作傳所謂韞輝杜君也母張氏生君兄弟二人君爲長弟景漢自幼相友愛終其身未嘗相尤少承父志持躬勤儉中歲起家致資鉅萬鄉黨待以舉火者幾千室光緒七年河決山東□□君奉母命捐千金濟振得 旨建坊如例乙未春日本兵入登州地青萊震動君倡修村堡所費數萬時東撫李公調兵防守駐萊

州軍餽缺乏君助饗銀二萬米萬袋又出錢修饗道自
沙河鎮至府城李公奏請獎敘並頒給扁額君平居尤
以濟人利物爲己任性喜文學嘗捐資勸立願學義塾
聚掖以南子弟秀長者延師課之所成就甚眾子二長
曰春榮中書科中書次曰向榮候選直隸州知州特用
知府以助饗功蒙 恩賞給二品封典得 晉封君爲
通奉大夫孫允熙附貢生候選訓導允熙候選縣丞君
卒於光緒三十年十一月三日春秋八十有五卽以次
年九月葬於先塋予友于華峰學正以所爲行狀屬予
表其墓予昔謁李公萊州防次公數稱杜君不置且曰

使東人盡如杜君則忠君親上之風益振彼外夷何由
內犯哉烏虜自東事起至今逾十年 朝廷日事更新
而民閒困苦日甚一旦邊方告警求如君之急公好義
者恐不復多觀予聞君嘗謂其弟曰天地生財原使人
共之使聚而不散何以財爲量吾力之所得爲者爲之
庶以成先人之志其所見如此宜其施德及人子孫昌
盛遠近稱頌其懿行尤爲人所難能哉光緒三十二年
冬十二月朔表

翰林院編修王君墓表

故翰林院編修王君諱蘭昇字芷庭登州萊陽人也光

緒六年冬十一月戊子以疾卒於京師春秋五十有二
平生交遊無貴賤咸往賻之明年喪歸故里其孤塾埏
請葆田爲銘幽之文葆田因循不果爲而其門人封正
何家琪實誌其墓敘君世系本末具矣君卒後十年塾
埏皆成進士相繼入翰林又十三年癸卯秋今翰林院
學士埏由國子監祭酒奉 命督學河南旋改今職是
歲新更官制翰林院學士階三品明年恭逢 皇太后
七旬萬壽覃恩加一級得 晉贈君爲資政大夫於是
學士埏復奉所爲家傳以告曰先公志不獲伸於生前
今吾伯兄又早世埏大懼無以表揚先德敢求所以信

今而傳後者惟先生哀其志而許之幸甚葆田與君爲鄉會同舉又皆受知於高陽李文正公當今上改元之初同官京師時相過從及葆田連丁大故君獨憂其不克振厲遺書勸慰庚辰春葆田服闋入都供職文正公一見卽問曰子同年王芷庭有經濟才其學識逾人百倍子亦與相知乎葆田因歷敘生同郡學同志與平昔往來甚習以對文正公喜甚旣而君臥疾數月葆田數往問視一日君見余至自牀興慷慨語曰子近見吾師高陽公乎今時局艱危如此爲大臣者宜亟求幹濟之才吾嘗有所薦於公而迄未見公以上聞吾病愈

會當往促之因噓唏泣下葆田固已心憂其不起乃未
逾旬而君遂卒文正公深爲歎惜其後君所密薦者或
相次進用以葆田所知今吏部尙書定興鹿公前四川
總督李公秉衡皆其人也始君少有志於功名嘗與鹿
公同客故侍郎勝保公所繼見侍郎日驕恣料其必敗
乃先幾辭去應宛平陳公聘教授濟南同治九年山東
舉行庚午並補行丁卯鄉試君爲首選先是巡撫使者
丁文誠公合試十郡士亦以君爲第一而君所教陳氏
子冕於君卒後成進士以第一人及第故君書法文章
並爲當時所重然君每與友朋談藝必曰吾書法受之

李伯敷刺史詩古文詞則宜良嚴秋槎高密單伯平兩先生之教也其門人何家琪亦云然君嘗爲人上書左文襄公奇其文又嘗見知於合肥李文忠二公皆屬人延請皆謝不往旣入翰林清苦異常仍資教授以爲生身後無一夕之儲爲人嚴正有至性幼時卽能色養始喪父時家貧甚顧殯斂皆從豐厚見者歎異方丁卯歲在濟南聞母噩耗一慟幾絕星夜奔赴時值髮捻餘匪肆擾道塗梗塞卒能疾驅返里無恙人以爲孝行所致云通籍後尤留心國計民瘼嘗陰求猷守兼優之士思與其濟時艱而卒齋志以終烏虜以君之志與行使其

得用於時必能如古賢人之所爲最其生平其推賢好
士有似於唐之李文公翱而文采亦近似之特其詩文
不幸散佚不多傳於世故學士君尤以爲歎昔歐陽文
忠之論李文公曰翱幸不生於今時使見今之事則其
憂又甚矣嗟乎今世豈復有如君者乎吾見天下事之
猶可爲也惟忠惟孝克光前烈學士君其勉之哉光緒
三十一年夏六月表

河南布政使孫公墓表

穆宗毅皇帝御極之初大學士倭文端公方以理學爲
天下倡一時出其門者類多潔修自好之士其後或以

直言極諫負當世重望或以功名顯而不獲終展其長者亦甚眾如吾鄉游侍郎孫布政皆其人也孫公諱鳳翔字文起一字梧桐其先由直隸棗強縣遷山東世爲濰縣人祖諱仲采父諱炤皆以公貴 贈光祿大夫妣皆 贈一品夫人公由郡學廩生中咸豐八年舉人同治元年成進士改庶吉士散館授檢討試御史充順天庚午鄉試同考官補江南道監察御史歷充鄉會試監試官署陝西道監察御史疏參內務府大臣貴寶與革員李光昭交通舞弊合肥李公見其疏曰是不媿真御史矣會奉天府丞張公奏請定鄉試應試人數順天學

政錢公奏請科試隨棚錄遺均經禮部議允矣公抗疏
爭之其略謂我朝列聖相承士子涵濡教澤二
百餘年文風日上比年特開恩榜並諭令借棚考
試所以扶植士氣維繫人心者至深且遠應請照舊章
辦理爲宜得旨俞允疏出士林誦之光緒元年冬

簡放江西知府召見時諭以兵燹後小民困苦知

府爲州縣表率務宜多方撫恤以培元氣明年補廣信
莅任後恪遵聖訓興利除弊次第舉行是時兩江總
督爲沈文肅公卽前守廣信以守城功赫然有名稱者
也廣信人謂公政績堪與沈公後先媲美而文肅公亦

以士愛民懷薦其賢彭剛直公巡水師至江西采輿論稱公爲清廉第一六年升廣東督糧道時張靖達公樹聲爲總督奏請洋務專歸道員辦理公以剛正不阿爲洋人所敬憚事多遷延不肯就公議明年遂改調惠嘉潮道會德領事欲侵汕頭地爲商埠公復與力爭事遂寢不果行至今汕頭地不隸於外洋者公之力也又明年調補雷瓊道未赴是歲八月 簡授安徽按察使入覲蒙 溫諭嘉獎抵任未逾月兩江總督左文襄公奏調赴江寧訊賂賢基獄是獄經數年未決公推鞫一晝夜遂成信讞文襄公大悅以爲明決無倫也旋拜河

南布政使之 命未數月又奉 命署漕運總督任事
兩月將返豫又奉 旨馳赴上海查辦事件公據實覆
奏並附陳援閩兵輪有二艘不可用請 飭南洋大
臣慎益加慎毋損軍實其後二艘果以窳遲致沈人始
服公先見之明公既回任旋奉 命護理河南巡撫前
後巡撫使爲鹿公傳霖邊公寶泉皆公同年友又皆嘗
受學於倭文端公故吏治號爲清明然鹿公治事精嚴
公則濟之以寬大而自受撫篆後憂勞口過兩目漸生
翳障及邊公接撫篆公遂以目眚請告奉 旨賞假兩
月毋庸開缺蓋異數也會部敘歷年籌餉勞 賞加頭

品頂戴公益感激圖報乃假滿疾仍未痊復申前請遂解任回籍以明年四月某日薨於里第娶于夫人子四符箴範箴符議敘鹽場大使箴議敘按察司經歷範箴皆候選教職孫十一人曾孫幾人公之薨也吾友柯編修實爲行狀以備史官之采擇獨取公奏疏有關時政者詳著於篇予爲掇其大要因竊歎近日新政之多紛更惜無能爭言如公其人者始公與游公同爲御史俱以言事知名游公由臬司內 召官倉場侍郎卒以微過去官公雖官終方伯而歷權督撫行將大用蓋 朝廷之知公深矣而不幸未竟其施此尤可爲慨惜者也

公子符等嘗問公所得於文端公者爲何曰吾師一生
惟守毋自欺三字其教人亦如是嗟乎此可以知其淵
源所漸矣

直隸補用知府前通州石壩州判高君墓表

濰有賢人君子曰高君西林生而孝友端肅立身行事
以濂洛諸君子爲歸於經史詞章之學靡弗研究其仕
嘗爲州判矣然一邑之人咸望之如山斗故不稱其官
職而稱其德行曰大人先生年七十有五以卒學者相
與擬私謚曰孝勤蓋自韓理堂先生後以學行見重於
鄉邦而無媿儒林宿望惟君爲尤繫人思焉君諱翰閣

一字墨林以同治元年壬戌 恩科舉於鄉十年辛未
會試後 廷選一等奉 旨以知縣用籤分河北時年
甫強仕或勸赴河工君以母夫人春秋高陳情乞養既
歸且讀且耕侍奉甘旨者又十二年光緒八年母喪既
除始奉檄到省嘗讞獄定州散振保陽皆殫竭心力克
稱其職尤究心水利嘗承修千里隄工河防今任並雄
縣居民猶歲賴其利又嘗建議近隄諸村落人民與居
隄內者均請免工徭左文襄公奉 命視河將從其議
會有言不便者議遂中止在工需次五年始循資借補
通州石壩州判石壩爲北運河要津漕糧輸京師者州

判有催提巡防之責君任事勤勞濟以廉正在官六年以在任候補同知洊保補用知府並加三品銜會督倉政者粵人某侍郎縱子納賄容任私人同官莫能糾其失君慨然曰地近輦轂而上下相蒙至此是尙可仕耶遂請開缺歸直隸候補又請假回籍修墓其後粵人卒以贓敗而君亦自是遂不復出矣葆田自寓居濰與其賢士大夫遊日久獨於君僅一再遇君優游林下者十餘年所居在城西去縣署不二里雖公事未嘗入公門每晨起必先至先人墓所叩謁徘徊良久而後歸至老不怠高氏自遷濰始祖至君十二世矣其先塋有五君

筮仕前歲有修葺及告歸後手植楸松近千餘株甲辰
春復自營生壙集宋賢語以爲誌曰幸全大節不辱其
先及將卒之前二日詔二子曰吾家世讀儒書窮達命
也汝輩不可曲學阿世以辱乃父又曰吾歿之後汝輩
勿預外事勿近要人烏虜君可謂夙夜匪懈者矣君卒
於光緒三十年六月庚午曾祖諱永清縣學生 地贈
文林郎祖諱甸太學生候選州吏目父諱允升附貢生
候選訓導皆以君貴累 贈通議大夫妣皆贈淑人娶
張氏子二崧生歲貢生陟生壬寅補行庚子辛丑併科
舉人從葆田遊述君行略乞余爲表其墓曰先人亟愛

先生文以爲有德者之言不苟毀譽葆田嘗聞諸維人云光緒二年邑游饑紳民設平糶局糧自外至負戴者貸以錢或議用市井無俚君力排眾議謂宜專任窮民民賴以全活者甚眾其遇事有識皆此類所著有帶經堂文集北遊瑣記若干卷嗟乎以君之學與守使得竟其所施必有以逾於尋常萬萬者然吾聞出處去就爲士君子之大節孔孟論人尤詳於進退之道故士君子進將有爲退必自修乃可以爲法於後世如君之內行不虧而又能出處不苟其足爲鄉人矜式者求之晚近士大夫亦何可多得哉

兵部尙書兼都察院右都御史兩廣總督毛公墓表

公諱鴻賓字寄雲世爲厯城人曾祖諱文英祖諱振基

考諱廷鏞三世皆以公貴 贈光祿大夫妣梁氏 贈

一品夫人生子三公其長也幼而穎異讀書輒通大義

年二十六舉於鄉三十三歲成進士官翰林 宣宗成

皇帝御試翰詹拜大卷江綢之 賜轉御史首疏外省

虧空流攤之弊請 敕禁革以重帑項 文宗顯皇帝

御極之二年公官兵科給事中疏言今日不患盜賊之

不平而患紀綱之不振自古未有憲典不明刑威不肅

而可以立國者是時粵匪紛擾半天下竄入湖南公言

欽差大臣賽尙阿駐衡州北路空虛請簡重臣分駐武昌襄陽以固藩籬上聽其議明年奉命回籍辦團練五年簡湖北荆宜施道調安襄鄖荆道初公與曾文正公爲同年友最相知文正謂公在諫垣所陳皆關繫天下安危胡文忠公題公疏稿以爲可謂鳳皇一鳴必任天下事天下之民其有託乎及公在襄三年文忠以有膽有識調度合宜保奏又密疏稱其好善嫉惡秉心公正十年夏擢安徽按察使九月擢江蘇布政使公感恩知遇益圖報稱十一年奉命署湖南巡撫旋即眞授是歲文宗晏駕胡文忠亦薨於位

其年冬粵匪石達開竄湖北犯會同公遣席寶田周達武等軍擊破之同治紀元石逆陷湖北來鳳公遣總兵趙福元復其城曾山東淄川逆匪劉德培倡亂 朝廷命公籌一旅保衛桑梓公薦長沙知府丁寶楨可大用其後卒平寇亂列於中興名臣之次人以是服公爲知人二年夏陞兩廣總督劾罷巡撫及布政司之不職者墨吏望風解綬去明年金陵克復江浙餘氛未靖公疏言江西南南路與閩粵交界均無防兵慮賊肆竄請 敕曾國藩等兼守南贛庶可一鼓蕩平有 旨褒許公所至必力籌全局方東南用兵鄰省請兵請餉無不悉索

以應故粵匪之平公雖不在行閒然亦與有力焉公之
爲湖南巡撫也嘗疏稱前撫臣張亮基駱秉章於吏治
軍務實力講求用能削平寇盜竊以爲得名將不過收
戰陳之功得賢督撫斯能造封疆之福論者謂督撫稱
賢公可謂不媿其言矣又疏稱左宗棠識略過人其材
力不在曾國藩胡林翼之下若畀以封疆重任必能保
境安民左公亦自是駸駸大用公所舉人才自左文襄
丁文誠外如郭筠仙侍郎蔣文恪志章惲次山中丞世
臨吳少村中丞昌壽李星衢中丞福泰皆經公保薦世
或不盡知也督廣年餘黜華崇樸風氣一變以湖南任

內失察同僚事鑄職罷官歸時丁文誠公實巡撫山東
用公言於濟南城外勸修石圩以防寇六年寇至不得
逞公猶率民團協守七年公疾作遂薨所著奏議若干
卷藏於家子慶澄承霖皆能承其家學葆田先人昔歲
服官湖北嘗事公得知公居官大節今予奉公子之屬
爲外碑義不敢辭當咸同之際宇內多故一時人才奮
起號爲中興而吾鄉赫然立名績爲將相者獨罕見如
公之受知 三朝見稱於曾胡諸公不可謂不至然竟
未獲終其用何哉公薨今已四十餘年會今 皇帝嗣
服有 詔嘉會舊臣並徧察中興大員政績於是山東

巡撫袁樹勛據紳士公呈臚陳公勛勞忠藎奏懇 恩
施奉 旨開復原官並將生平事蹟宣付史館立傳而
後公之志事乃益昭著於天下然論者猶以公未遽邀
易名之典爲憾子述公事獨揭其有關於當世者以俟
異世君子之論定其他則歸安陸心源所爲神道碑文
備矣

河南試用知縣南皮張君墓表

光緒三十年九月河南試用知縣張君達生居母憂以
疾卒先是君奉大府檄察歸德府土稅事沈翳不可猝
理旣聞母疾亟馳歸歸未至而母卒大痛漿水不入口

者數日遂患痢日增劇至是竟不起距母劉宜人之喪百八十有五日其孤宗瑛等以明年某月日奉兩世之喪歸葬南皮君之葬也東阿周君誌其墓序君事親及宦蹟所至詳矣旣而鄉人同宦中州者感其孝行爲顯請大府聞於 朝得 旨旌表並編入 國史孝友傳

朝廷所以教孝教忠者可謂至矣君之志雖不獲伸於生前而其顯親揚名獲 褒榮於身後不誠無媿爲君子之子與君諱元翰達生其字也父諱嗣陶同治六年舉人官萬全縣教諭予嘗爲銘幽之文稱其子孫多賢才君自幼侍親事王母卽以孝聞有仲弟能讀書君

請於父使繼先世業而身親賤役以營甘旨久而彌恭
仲弟已膺鄉薦後數年得疾京師君禱於祖廟願減己
之年以益弟及弟卒奉父命迎喪歸葬有加禮王母卒
後始專心嚮學出而應試爲博士弟子中副榜光緒五
年舉於鄉六上公車不第以資爲學官選獲鹿縣教諭
俸滿復過班知縣丁萬全君憂葬祭悉依禮制服除改
發河南奉母之官需次大梁時年已四十有八矣踰歲
署澠池革除陋規之不便民者十數事當官守正不阿
有齟齬之者遂不得久於其任然大府探輿論知君實
心愛民也踰年委署寧陵其出治一以前明呂新吾爲

法嘗募印其遺書分寄同志尤善治盜號稱嚴明及去
任時百姓詣大府乞留者數百人母劉宜人聞而喜曰
吾子真不媿爲民父母矣始君再入資爲縣令實爲祿
養計旣權縣事至再而清貧如故又每念萬全君祿不
逮養則心常欲然故於母夫人前惟恐一日不盡其誠
敬及遭母喪其自視若深有媿於前人也卒之夕問姻
戚有爲其母祝壽者感而大痛痛哭失聲旣而曰窶窶
未安可奈何可奈何遂卒嗟乎此可以見君之心矣吾
聞孝有三大孝尊親其次弗辱其下能養而禮稱居喪
之禮毀瘠不形又曰五十不致毀君年已五十有三其

居母喪本不宜毀以滅性然士亦視其平居自立何如耳如君之制行不虧使非遇 聖朝闡幽表微則異時敦孝行者果何能使人聞風興起哉夫孝爲庸行人子豈有欲人稱願之心特人心同具此理則雖愚孝愚忠必不忍徑聽其湮沒不彰耳張君死人或有議之者子故因表君之墓特發此義以質當世勵行知禮之君子
光緒三十二年夏表

徐君墓表

君諱楷字式堂浙江山陰縣人父某以書畫名客遊鳳陽遂居焉母陶氏生子女二女適同里石府君某君生

母魯氏早故咸豐初粵匪陷鳳陽母兄皆及於難君以
隨姊夫在亳州得免旋丁父憂遂依石君避地山東旣
遭家多難資產蕩然中歲改習申韓家言應東諸侯聘
治獄以明恕稱主人或有過失輒面爭人以是敬而憚
之石府君卒於石河官所君撫視其孤同居其財患難
相恤事女兒尤敬恭娶桐城方氏生三男三女其長次
皆早亡君以是常不適光緒辛卯一遊汴返至濟南遂
卒有甥曰石庚少與君其筆硯聞耗乃馳歸卜葬君於
懸城之南與石府君冢相望也庚今官開封府知府特
用道 欽加二品頂戴以 皇太后萬壽大慶推 恩

貶贈君如其秩既復述君遺事屬余表其墓余聞君爲人敦孝友嚴名利之辨嘗以縣丞選江西吉安不一歲輒棄去曰吾安能鬱鬱居此久耶去之日鄉民送者數百人蓋其惠愛在民若此其至汴也實欲視其甥服官行義一日見宴客酒饌稍豐輒呵責不少貸庚之言曰吾自有生以至舅氏之歿五十三年賴舅氏以養以教以至於成立至今兩家雍睦無閒不敢忘先太夫人與舅氏之遺教也此可以知君矣嗟乎近世風俗日偷其由幕而官者類皆爲身家計耳余嘗謂前代徵辟之法得賢才爲盛今誠仿而行之宜自州縣幕佐始庶幾賢

否有辨亦不至誤國病民如徐君之賢不誠加於人一等哉君幼子名朴今官山東某官亦以賢能著光緒三十二年夏四月表

楊府君墓表

澠池自前明曹月川以躬行實踐爲一代醇儒迄今數百年鄉人聞風興起者常不乏人吾友楊子方述其先人懿行請予爲表墓之文其言曰先君子讀書敦行年未五十以諸生終塋無似不能躬勵實修以爲先人光今幸博一官得叨 封典而先君子棄養已三十年矣銘幽之文實吟秋先生代張君作夙知夫子與吟秋先

生爲文恆持戒不輕以許人今願竊有請焉按狀君諱際三字晉齋又字鏡湖父旭園子監生前母邵孺人母裴孺人生而篤慎早歲入郡學爲廩膳生父卒家居奉母事兄惟謹咸同閒遭寇亂偕兄負母避亂山中甘旨無缺寇退散積麥以贍於人居母憂葬祭悉依禮制不用鼓吹鄉里化之屢躋舉場授徒里門不計束脩著願學堂學規立學社啟祠堂講學論文雖病志不少衰其教人必舉張清恪公小學集解與呂新吾呻吟語諸書光緒元年舉行 恩科猶力疾赴省試歸而病甚明年閏五月某日卒娶李孺人子二長莖字子方光緒口年

舉人今爲祥符教諭次保和亦有家風昔陸桴亭稱曹
月川爲真教官謂必如曹先生方可坐明倫堂方可稱
爲師表又謂夜行燭一書是真能諭親於道者楊府君
學行可稱而齋志以沒猶幸有子克傳其業爲教官爲
師表將所謂立身行道者既在其身又且在其子若孫
矣烏虜世方廢學又不以人倫爲教吾於何先生之銘
楊府君其曰坊表未湮又云何厭乎寂以寘不誠有味
乎其言哉

安平縣知縣循良婁君墓表

光緒四年夏畿輔大水滹沱河溢入秋瀕河州縣被災

尤重於時署安平縣知縣山陰婁君甫受事卽以邑境
四分成災上聞山大府入告得旨緩當年租賦並振
以銀米君躬行僻鄉按視戶口賦食與衣罔有不給所
至民迎拜如家人父子先是滹沱河自同治六年北徙
縣境淪水者百二十餘村君日權輕舟度地高下教民
疏導措置水車騰流下槌水以漸澗可宅可耕比返署
晝夜判治文牒未明而起至漏三下不休竟以積勞致
疾到官未四月於是年冬十二月二十九日卒於任所
士民聞喪爭相奔哭致賻匱發之日鄉民數百人自懷
糗糒願爲舁夫老幼扶攜哭送數十里不絕邑人勒碑

以志遺愛越三年辛巳直隸總督李文忠公據深州知州朱靖旬稟請奏卹部議加贈知府銜三十年甲辰今直隸總督宮保袁公以已故知縣政績卓著遺愛在民顓懇宣付史館立傳奉旨俞允君諱詩漢字卓堂祖父諱青官河南彰衛道父諱煜官直隸石景山同知護永定河道君雖世家子自幼無華靡之好年甫冠卽以從九品分發河南尋改發陝西補襄城縣巡檢咸豐初丁內外艱服除改官直隸六年以縣丞署涿州州判同治三年代理靜海縣主簿四年署景州運河州判先後以海運及防捻功保升知縣並加知州銜補缺後以府

同知用十年代理永年縣事在官僅百日清理滯獄數
百光緒二年代理成安縣爲治一如永年君卒年五十
有九配沈夫人側室郭宜人子六曰杰謙書緝書紱書
瑞書綬書杰以籌振敘勞保至三品銜分省補用知府
謙書直隸候補知縣緝書候選中書科中書與余善以
其伯兄所爲府君行述示葆田曰先君治行雖經張靖
達俞曲園諸公賜撰志銘家傳而墓表闕然未備伏念
先君生平篤嗜性理之學由慎獨存誠而推及於倫常
治道雖志存康濟而不能與時俯仰所至勤求民隱其
得民心在此其宦途偃蹇亦由於此余謂君起末僚游

陟守令且以循績宣付史館揚名於後世荷當代巨公
之表彰亦不可爲不遇特以格於新例身歿未及三十
年未得祀入名宦祠而 國家定制凡子孫見爲九卿
者其祖父俱不得請入名宦鄉賢雖曰以防請屬今又
拘以年限是使爲名宦鄉賢子孫者必皆不克肖其先
人而後可則何以見爲善必獲報哉君之由直督奏請
立傳也所援乃安徽泗州與河南光州兩案所謂光州
知州實余亡弟叔謙其遺愛在民固人人所共知當時
奏牘旣出余乃得聞其事因念我先人厯官湖北穀城
大門漢陽鍾祥蘄州皆有政蹟在志乘或立碑記或建

有生祠而歿已三十年竟未列入名宦豈年代稍遠民
或忘其澤與抑以子孫之不善稱揚而人遂有善弗知
與夫安民必資循吏而傳與不傳是在爲大吏者之加
意訪察如婁君者得當世表揚洵足風勵羣僚矣余因
表君之墓還顧身世蓋亦不能無感云

校經室文集卷四